

蘇州府志

廿六

卷之六十四	卷之六十五	卷之六十六
人物十八	人物十九	藝術十六

漢書門類	九〇八三	函架	三二
------	------	----	----

內閣文庫	九〇八三	漢書
冊架	三二	冊架

內閣文庫	番號	漢 9083
冊數	32 ( 26 )	
函號	292	13



蘇州府志卷第六十四

人物十八

吳江縣 新分震澤縣人物附後

淺草文庫

宋

魏憲字令則吳江人與弟志俱進士

吳郡志憲紹聖四年進士 有聲太學號

熙豐人才累遷國子司業親喪三年弗御酒肉廬於冢上有


芝草甘露之祥再為司業以學行見推兼太子舍人遷中書

舍人給事中文溫厚雅正得代言之體宣和二年以直龍

圖閣知常州三年除太常少卿歷顯謨閣學士知明州建炎

二年為吏部侍郎時案牘散佚吏緣為姦有偽名寄貫之弊

憲請嚴保任開告賞急期會以戢其弊又言古未有背天險



以爲都者虜騎由京西不四五日可至淮泗宜有以待之久  
之以直學士提舉江州太平觀歸鄉里名所居曰止菴優游  
十餘年無疾而終年七十三志字幾道志四世孫汝賢淳祐  
四年特奏名狀元

盧志

松江漁翁不知其姓名每櫂小舟遊長橋往來波上扣舷酣歌  
自得紹聖中閩人潘裕自京師調官回過吳江遇而異焉起  
揖之曰予視先生氣貌固非漁釣之流願句緒言以發蒙陋  
瞪視曰君不凡若誠有意能過小舟語乎裕欣然過之翁曰  
吾厭喧煩處閒曠迹於此三十年矣幼喜誦經史百家之  
言後觀釋氏書今皆棄去唯飽食以嬉尚何所事裕曰先生

澡身浴德如此今聖明在上盍出而仕乎笑曰君子之道或  
出或處吾雖不能棲隱巖穴追園綺之踪竊慕老氏曲全之  
義且養志者忘形忘形者忘利致道者忘心心形俱忘其視  
軒冕如糞土耳與子出處異趣子勉之裕曰裕也不才幸聞  
先生之高義敢問舍所在翁曰吾姓名且不欲人知况居室  
耶飲畢鼓枻而去

宋史

王蘋字信伯其先福清人唐水部郎棨時號人瑞有麟角集八  
世孫伯虎字炳之嘉祐進士歷戶部員外郎與蘇黃唱和從  
弟仲舉字聖俞剛介厲學不徇時好徙家吳之震澤卒贈奉  
議郎生蘋出爲世父伯起後伯起字聖時受經王安石游曾

蘇州府志 卷六十四 二  
公亮父子間學文於子固題所居曰西室有詩曰唱道野集  
卒贈右宣教郎二程在洛伯起遣蘋往從之遂爲河南高第  
通春秋視楊時猶爲後進時亦謂後來師門成就者惟蘋耳  
三舍法行遂不就舉紹興初高宗幸平江知府孫佑言蘋素  
行高潔有憂時愛君之心開物成務之學丞相趙鼎以聞召  
對補右廸功郎賜出身除正字兼史館校勘受詔條具賊退  
利害蘋奏治本三事曰正心誠意曰辨君子小人曰消朋黨  
上謂輔臣曰蘋起草茅而議論進止若素官於朝者大抵儒  
者能通世務乃爲有用預修神宗實錄優詔獎諭朱震胡安  
國尹焞皆舉以自代安國論薦尤力謂其學有師承識通時

務使司獻納必有補益遷著作佐郎通判常州主管台州崇  
道觀爲秦檜所嫉奪官久之復昇祠引年致仕官至左朝奉  
郎卒年七十二蘋識慮精微議論平易隤然若與世忘旣老  
作論語集解未成合集文集爲四卷章憲陳長方楊邦弼皆其  
門人也嘉熙元年知府王遂祠之學宮寶祐初里人立像震  
澤鄉校以長方邦弼配食號三賢子大本朝請郎大中儒林  
郎從孫楸字勉夫早孤奮學事母母歿以不逮養不肯預鄉  
薦所著有野客叢書三十卷集曉稿五十卷子德文字周卿  
克世其學與魏了翁真德秀游以杜範王遂薦官至承德郎  
子孜字行父終日清坐不聞聲咳童豎入見亦斂容而起著

雲嶠類要紀事極該博

姑蘇志按中吳紀聞云子孫世守府城德慶坊故居是嶠初居震澤後

徙府城耳陳長方後亦居吳中然吳縣志俱不載獨入吳江志者豈以吳江人物少而讓之歟

陳長方字齊之其先長樂人父侁字復之擢進士第娶吳人林

旦女與陳了翁交從甚密了翁謫廉州侁以書賀之至千餘

言由此得罪又從游定夫學得治氣養心行己接物之要長

方生長外家從王蘋游紹興中舉進士授江陰教授尋歸居

吳中步里終日閉戶研窮經史著書各步里客談及春秋禮

記尚書傳漢唐論俱行於世學者稱唯室先生弟少方字同

之亦端慧不羣孝宗朝為東宮講官號二陳

中吳紀聞盧志合纂

楊邦弼字良佐其先浦城人文公億四世孫來從王蘋學遂居

震澤探極理趣發為詞章紹興十二年舉進士第三會行都

建太學選為博士踰年通判信州服除以大理卿

卿字疑作丞改

湖南漕不務勾致甚得大體遷秘書丞著作佐郎又兩遷吏

部郎以起居舍人使金還遷起居郎中書舍人卒

盧志

王誼字正仲蘋從子師事楊邦弼以學行鳴於時秦檜當國忌

天下能者誼因發憤為罷相對以刺之為其僕所告檜怒貶

象州十年乃歸遂不復仕著春秋類書

莫旦徐師曾吳江縣志合纂

趙璠老字渭師其先東平人居吳江黎里孝宗朝以書狀官隨

范成大奉使金國成大薦之擢正言乾道八年以右通直郎

知楚州入為太府寺丞復由兩浙轉運副使知臨安府除祕

閣修撰權工部侍郎所著有拙菴雜著三十卷外集四卷姑蘇

志參舊縣志

王份字文儒少力學工詩文隆興中以特恩補大冶令律身清

謹政尚寬恕修學校置田養士縣產鐵舊有鐵務病民份奏

減其額民德之繪像祀焉在縣七年一日登西塞山誦張志

和漁父詞即致仕歸作室於雪灘號臞菴居士莫志

沈義甫字伯時嘉定中領鄉薦為南康軍白鹿洞書院山長舉

行朱子學規時稱良師久之致仕歸震澤鎮建義塾講學又

建明教堂以祀三賢學者稱時齋先生卒年七十八著時齋

集遺世頌行世徐志

莫子文字仲武綺川人少敏悟通經史寶慶二年舉進士出知

嘉興縣會王疇奉使括田法甚苛細子文不從疇譖之田使

劾其拒命理宗素知子文止降宣義郎制詞云降爾一秩非

朕得已然亦因是知爾之為人仁矣田使見之怒奪不與後

五年始復其官遷道州通判累官朝徐志大夫知廣德軍兼內

勸農營田事賜緋魚袋卒年七十五文獻合纂

陸十七吳江震澤市民父疾刳心作糜進啗遂愈寶祐二年郡

守趙汝歷為建旌孝坊又嘉熙中郡守吳潛建純孝坊以旌

湯家浜里人刳心療母疾者惜逸其名姑蘇志

盛明遠文肅公度十一世孫其先汴人度五世孫岫建炎初扈

蹕南渡通判平江府卜居吳江儒林里遂以科第甲邑中明  
 遠以咸淳六年領鄉薦為廣州錄事判官宋亡隱居不仕元  
 世祖聞其賢召判惠州自以世受宋恩堅辭不就詔書責迫  
 變姓名從老氏以終

徐志參松陵文獻

元

寧居仁太尉玉之子也本河陽人玉從伯顏南下留戍長橋後  
 以都元帥退老吳江自居仁以下遂為吳江人居仁能修父  
 業累官鎮國上將軍廣東道宣慰使都元帥弟居正僉行宣  
 政院事昌言江南財賦司副使孫宗玉好書禮有儒者風幼  
 侍其父戍湖廣五開衛跋涉艱險父卒事母以孝聞總兵知

其賢命掌中潮千戶所書記剖決如流人皆稱之

松陵文獻

李真字允真宋祕閣侍郎衡裔孫也年三十喪其妻未及葬真  
 以役事出家偶失火焚其棺真歸號痛收骸骨葬之而虛其  
 右以自待終老不再娶子昱嘗輸粟百斛賑饑有司旌以冠  
 帶辭不受人稱其世義云

徐孝祥吳江人家貧力學不干仕進嘗於廬後掘地見白金輒  
 掩不發居三十年為至治壬戌歲大飢乃盡發之以賑貧乏  
 全活不可勝計其後嫁女甘於荆布錙銖弗取也子純夫以  
 明經發解官翰林供奉承旨受封如其官卒年九十七

盛輿字敬之初為震澤鎮教諭陞錦州學正兵興參謀浙省軍

政擢崇德州判官輿嘗受易於郡人龔子敬好古博識醫卜地理之書靡不通究所著有韻書羣玉滴露齋稿以上俱吳江舊志

王原傑字子英至正四年舉於鄉值兵亂不仕隱居授徒深於

性理之學為詩文雅健高古學者稱貞白先生所著有春秋

讞議貞白英華文集水雲清嘯詩集子思忠亦有文學張士

誠據吳屢召不至率眾保障鄉里明師東下徐達單騎至城

下諭降知州楊彝不知所為思忠謂曰羣雄割據生民之禍

極矣今王師弔伐禍自此弭又有山卵之勢奈何不歸附乎

乃與彝率眾降達嘉之賜思忠旗章俾鎮守焉事平歸里莫志

華翥字伯翔好古力學有聲士林性至孝母疾禱北辰而愈及

母歿翥猶持律甚嚴

吳復撰華孝子誠感序曰至正辛丑夏四月丁未朔與客抵僧宗舍宗為黍飯

之將殺雞翥以齋禁辭弗聽刀忽墮地折為三乃止眾駭其事咸賦詩紀之徐師曾曰翥事近怪誕儒者所不道然吳復

非妄人又日月可考信理或有之 松陵文獻

明

吳簡字仲廉吳江人元季數舉於鄉不利遂杜門積學尋以薦

授郡學訓導陞紹興學錄洪武四年應詔至京以疾辭歸優

游林泉自號月潭居士年八十二卒所著有論語提要史學

提綱守約齋集子復湖廣僉事頤縣學訓導俱有文名

姑蘇志

鄒奕字弘道吳江人秀目美髯貌若玉雪論議英發文詞高古

至正中登進士調饒州錄事洪武初為御史出知贛州府坐



事謫甘肅二十餘年永樂初以蹇義薦名姑蘇志還有吳樵稿

朱良實字子誠父鳳有樵唱集良實讀書好古在元季有文名

入明已老隱約不仕以詩文自娛號百拙老人卒年八十餘

所著有松陵續集漁唱稿

顧諒字季友後陸巷人博通經史作儀禮注值元末兵亂隱居

不出性坦夷不事畛畦結廬曰怡齋自號癡叟王行為癡叟

傳

沈敬字有莊洪武四年舉明經賜光祿酒饌尋放還嘗應辟縣

學西齋事所作詩文號西齋集

黃本字本中先世自江夏徙蘇郡張氏據吳本避地同里遂家

焉洪武中舉明經為武夷訓導歷會昌教諭於經史百家之

書研極理趣其文章豐腴詩詞藻麗典則游遭兵燹稿多散

佚識者惜之同時有凌昌字正卿性聰慧強記尤邃於書為

文汪洋明潔洪武十二年舉明經授縣學訓導遷太平教授

卒所著有儀古集又陳玠字以進少從黃本學博綜羣書工

詩文從弟琮字叔振亦能詩善書皆同里人也

謝常字彥銘少與陶振同師楊維禎學識該博尤長四六洪武

十五年舉秀才名見試丹鳳朝陽賦稱旨上欲官之常以母

年百有六歲請歸終養許之遂隱震澤之東溪教授生徒至

永樂初猶存年八十三卒有桂軒稿東溪集已上並松陵文獻

莫禮字士敬子文七世孫洪武二十年以稅戶人材徵授戶部員外郎與同官沈玠等上疏辭祿許之秩滿超擢本部右侍郎轉左侍郎勾較簿書精解版法上嘉其能二十六年藍黨事起同邑顧學文等坐同謀詞連禮與員外郎張瑾主事李鼎崔齡徐衍等俱被誅臨刑賦詩有云一心忠義堅如石惟有皇天后土知聞者傷之瑾字叔瑜以人材授工部員外郎與弟荊州知府瑄俱坐黨死鼎亦以人材授禮部主事衍字仲易以人材授工部主事又有葛德昭二十九都人以人材授刑部員外郎子芳以人材授禮部員外郎皆坐黨禍死

二志松陵文獻合纂

莫徐

張疇字季連世居越溪以貴雄於鄉而疇獨輕財好學構素心堂日吟咏其中三吳名士多從之游自號南村居士二兄瑄瑾皆以人材為顯官疇毀形閉門自守而已州縣徵辟皆不就後竟坐黨禍籍其家所著有陶菴集

松陵文獻

馬達字伯行洪武中以人材徵授合水縣丞以憂去改昌邑為政廉平人不敢干以私粗衣惡食其妻不能堪乘間言之達怒曰爾欲使我為惡耶後終河間經歷

姑蘇志

盛逮字景華吳江人洪武初以賢良應召賜冠帶參大臣議事與中書參政陳寧議不合以疾辭歸弟彰以鹽法被捕甚急父憐其少不忍遣逮請曰弟未有子兒願往因謫戍寧夏先

是逮歸里寧適守蘇將甘心焉亟欲見逮不得乃命逮督辦  
 通區逋賦傾資代民償之友人唐自牧負官租計白金二百  
 兩走告於逮如數與之翰林待詔李幹老無所歸逮延至家  
 塾既卒葬於墓側歲時祭之逮嘗游關中得異人導引法作  
 原道詩卒年九十三

姑蘇志

曾燿字日章以字行父朴浙西醫學提舉自杭州徙吳江日章  
 博學有才智洪武十七年以歲貢授黃陂知縣興學勸農政  
 聲大著秩滿解官歸三十五年以薦擢翰林院侍讀永樂元  
 年與修永樂大典奉詔諭安南黎蒼語不遜日章折之具服  
 宣讀如禮二年還陳黎氏篡立當征狀四年命從西平侯發

雲南兵討之軍中文檄皆出其手賊平贊畫功為多五年還

報復承命往諭諸將使還卒於富良江舟中子堅字孟堅由

太僕寺典簿歷官四川雲南左布政使

王汝玉墓碑參縣志

陶振字子昌其先華亭人贅於麗山謝氏遂為吳江人少與謝

常同學於楊維禎兼治詩書春秋三經洪武二十三年舉明

經授縣學訓導嘗坐佃居官舍逮至京師撰紫金山等三賦

以進得釋遷安化教諭歸隱九峯間授徒自給一夕死於虎

王達善挽詩云昔為海上釣鰲客今作山中飼虎人釣鰲客

振自號也

松陵文獻

陳晉字次翁元末偽吳竊據其父坐作詩謗訕論死晉請以身

代父子爭死不決主者謂代父者孝代子者慈慈孝之人安肯訕上遂皆免之父尋病死既葬猶朝夕哭至失明洪武中晉妻家坐藍玉黨逮治事連及晉棄家遁去以存宗祀後赦歸孫讓亦善事親鄉里稱為世孝

松陵文獻

何源初名德源字幼澄同里鎮人洪武二十九年舉於鄉會試中乙榜授保德州學正擢德州知州歲旱隣境多蝗源禱於神蝗不入境母喪服闋以薦陞梧州知府山水驟至漂人民廬舍存者無以聊生眾議具奏請賑源曰若俟奏報民皆死矣首出己俸又貸粟富民以賑全活甚眾毀淫祠禁競渡以誑誤謫交趾英國公張輔舉署交州學事嚴立教條未幾選

貢得士十餘人有位至方岳者召為考功員外郎遷鄭府長史嘗繪歌器圖進王以盈滿為戒事聞賜誥褒美復改文選郎中正統初擢江西右布政使會詔勾補遼東大寧萬全諸衛軍甚急源上言南人弱不耐寒雖至其地死亡必多乞於見勾數內存留幼弱者三千餘人于南昌衛操練則人不失所而朝廷亦收其用報可民甚便之致仕歸自號東吳遺老足跡不入城府卒年八十六

魏驥撰墓表  
參松陵文獻

莫轅字吳仲禮兄子洪武初父繫詔獄將刑轅年十一願代父死里官試加脅誘語無異詞遂奏釋其父而繫之轅父更為稱冤闕下竟瘦死轅獲赦季父禮有寵於上時國法方嚴轅

憂之勸祖諱散其家財兄輪不從乃謬指隸洱海衛者為己族人皆怪之後藍黨獄起諱與禮俱死一家無脫者獨轅以

嘗附尺籍免兄子雲霖俱幼孤轅保護甚至復變姓名潛入

都下竊祖叔遺骸

潘樞章曰莫志作祖叔蓋指諱與禮也徐志不詳改叔為父且前已云父瘦死矣何

自相矛盾耶

歸葬之屢冒法禁幾死建文元年赦歸痛念家禍不

御酒肉者數年家失火延及母寢轅躍入火中抱母出鬚眉

盡焚轅少從張適易恒游老而好學為詩文有理趣卒年七

十七門人私謚貞孝先生

姑蘇志參松陵文獻

平思忠

縣志字兩中

初為縣吏後滿入京薦授禮部主客司主事時

文皇方事招懷諸國朝貢者日至主客事殷思忠有精力事

皆立辦尚書呂震器之陞為郎中嘗以事下獄適北部入貢

新任主客者多不稱旨震因言思忠即日赦復其官時以給

事中楊弘為陝西布政欲使清强有力者伺察之遂擢思忠

陝西參政嘗杖一推官其人誣以賊坐謫戍北邊會太監劉

馬兒奉詔市馬西域以思忠在主客久多識賈胡請以自從

詔釋其戍給冠帶隨馬兒使吐蕃諸國而還後卒於家初知

府况鍾亦以吏起家官主客與思忠有交承之分鍾來蘇數

延見思忠執禮甚恭方暑留飲命二子執扇更侍曰非無僕

隸欲使兒輩知公為吾故人耳然思忠居貧自守未嘗以事

干鍾人尤多之性清簡善草書家有清娛樓

史鑑平思忠傳參松陵文獻

徐昌伯永樂中坐事謫戍遼東家有老母其弟季昭請兄留養而以身代行昌伯曰爾年少不更事豈堪遠戍二人互爭久之母竟遣季昭行後十餘年季昭還母兄尚無恙鄉人題其堂曰孝義

徐志

吳驥字良材同里人家貧力學恬於勢利洪熙元年舉明經授濬縣訓導正統元年改壽昌遷清豐教諭致仕卒驥博學強記教人嚴而有法時稱名師山西河南陝西諸省鄉試凡五聘爲考官所取皆名士卒年八十三所著有蒙菴集歸田稿子鉉字時舉天順六年舉於鄉授四川布政司經歷致仕歸爲人沉靜質厚居家孝弟威寧伯王越師事其父與鉉交厚

及貴未嘗往謁人以此多之與驥同時有吳鎮字陽稽能詩見湖海耆英集又有吳璩與同郡徐鏞賀甫等並以詩名

吳璋字廷用幼孤爲鍛工永樂二十一年詔選天下節婦給役內廷母陸氏名在籍中宣德元年淮王之國韶州尋徙封饒州陸氏皆行璋棄家奔走求母者二十年屢啓王請見不允書凡十四上情詞益切王憐而許之命入宮見母母方病革璋徬徨剖股作糜以進病稍間王聞愈憐之召賜金幣遣其母出至逆旅三日遽卒乃匍匐負骨歸葬先墓旦夕展拜淒動路人時正統十二年也後以子洪貴封南京刑部主事士大夫咸爲詩文美之號曰全孝翁年八十一卒贈太僕寺卿

莫震字廷威正統四年進士知嘉魚縣爲人修潔謹於祀事每  
秋冬巡行郊野修陂池橋梁爲民興利奏革五湖河泊所縣  
有白面山產佳石楚王請於朝遣使來採碑震往來助役護  
衛軍爲暴撻之而後具啟後考滿朝王王致謝且命賜宴在  
嘉魚八年日與僚吏登山臨水飲酒賦詩有古循吏風父喪  
歸服除改知海鹽縣修捍海塘百七十餘里爲一方保障遷  
建寧通判署邵武府事賜勅旌異遷延平府同知致仕歸年  
八十一卒所著有由菴集嘉魚志

潘翼震澤農家子少爲里中黃景融家奴執役勤恪正統初中  
官奉詔督徵逋稅行部稍不如意輒執令去時縣令被執景

融爲稅長與其黨攘臂奪還中官訴於上詔捕誅景融景融  
舉家惶駭翼請曰主僕卽父子耳願代死無悔遂就捕至京  
師論死拷掠無完膚終不易詞後赦歸景融感之更加巾服  
與諸子並列約死同葬於墓翼目不知書而從容就義人以

爲難

已上徐志參  
松陵文獻

盛景字允高景泰二年進士授御史清山東馬政以災傷上疏  
乞蠲民所負孳息巡按廣東瀧水賊起景單騎諭降之劾巡  
撫侍郎揭稽不法稽坐左遷六年七月以時多災異偕同官  
倪敬等上疏諫忤旨謫古田典史天順改元遷羅江知縣歲  
早教民鑿池一千二百五十餘所遂爲永利德陽寇趙鐸僭

稱趙王流劫郡縣景伏奇兵遮擊大敗之邑以完民爲立生  
 祠於羅真觀擢叙州知府戎人珙筠高士猪叛朝廷遣將討  
 之前軍遇賊少却景在後突之矢着兩耳戰益力賊驚亂官  
 兵乘之遂大克以耳創甚致仕後追理前勞遣使資金幣寶  
 鈔賜於家景孝友自叙州還置第郡城呼兄弟共居之又迎  
 養姑姊之無依者獨以簡傲召毀然不能掩其大節云

明史  
范純

誌姑蘇  
志合纂

尹寬字孟容黎里人性曠達隱居不仕號江南布衣工詩文與  
 郡人杜瓊陳寬輩齊名成化初卒外弟汝訥爲詮次其文號  
 易齋稿同邑曹孚字頤若亦隱居士工詩文有楓江集又王

雲字時望爲諸生好學能詩與沈周周用爲友學者稱葵南

先生 徐志松陵  
文獻合纂

汝訥字行敏黎里人景泰四年舉於鄉成化三年以善書授中  
 書舍人遷南京武選員外郎進郎中時王恕爲尙書訥與同  
 郡李應楨嘉興呂憲等並以文學爲恕賓客出爲汀州知府  
 憂歸服除補南安威惠大行弘治二年罷歸尋卒訥爲人坦  
 易善談論喜爲詩書法得晉人體小楷尤道美居官三十年  
 田廬不改於諸生時所著有學鳴集從子泰字元吉弘治九  
 年進士歷吏部驗封考功郎有時望甄別人物羣情允服出  
 知永州府卒於官

徐志



莫旦字景周震子博學工詩文成化改元領鄉薦卒業太學作  
一統賢關二賦名動京師授新昌訓導遷國子監學正乞歸  
年八十餘卒旦平生著作甚多嘗論吳澄以宋臣仕元不當  
列從祀趙孟頫以宗室事讐不得爲名臣皆名言也所撰吳  
江志積三十餘年始成典雅可觀又有新昌志鱸鄉集行於  
世

黃著字誠夫震澤人父珩宣德中以文學才行徵授温州府經  
歷遷縉雲知縣有惠政以母喪去起爲廣東布政司經歷卒  
著少以氣節自高成化五年舉進士授新昌令俗悍善訟著  
苛察如神不少假借有請謁者輒集僚吏見之皆慙懼不敢

發而去民黠桀者悉流之或規其太過著曰不如是無以戢  
暴也遷監察御史巡按山西再按廣東方面以下有穢墨者  
輒望風解印綬去都御史王越屢稱著才有大政必召與議  
以母喪歸尋卒著好舉淹滯而恩讐太明人多疾之

吳瑄字元玉少從父戍京師宗族不相知者數年父死哀痛倍  
至一日得其族譜大喜祭告其父將歸訪焉時人或嗤其迂  
成化五年舉進士授南京工部主事累遷郎中事母至孝母  
愛少女令與婿同居婿無狀瑄弗與較積三十年無間言舅  
氏在松江貧母念之瑄爲買田宅以慰其心同族雖疎遠遇  
之有恩族子鳳捨身釋氏迎歸撫之道遇故人喪不能歸遣

使扶持還葬性好學工古詩文對客立就未嘗屬草又善書畫卒年五十二理義而貧仁而不壽孝而無子時人莫不哀

之已上並徐志

顧寬字惟仁性孝友居母喪三年不入私室與弟宏俱八十餘歲不分爨初立弟子綱為嗣後生二子曰純曰綱而撫綱如一族人灑貧不能存寬乃日給食歲給衣有故則給以金穀終其身外祖李昱墓枕吳淞江屢經水患寬出錢千緡築石捍之伯父有壻曰錢璠死無葬地寬買地葬之及掘地得故塚命掩之而復擇他地其好義類如此舊縣志參通志史鑑字明古曾祖彬以高貲為稅長有任俠名坐累死秀水獄

或云即史仲彬建文時為翰林侍書記從亡事辨見下

鑑博學洽聞年十二三為四六

近體語即驚人既長肆力為詩文雄深古雅嘔然成家足跡不出百里而人皆知其名狀奇偉鬚鬣奮張與人論事辨說超卓雖尊貴無所屈長於史學論千載事如見若錢穀水利之屬尤所深究居穆溪之西有園亭竹木之勝圖書供具皆極精麗客來就鑑鑑為設先代之容曳履揮塵清談彌日其治家嚴如官府動遵古禮巡撫王恕聞其名延見與論政務深器其才常虛心咨訪未嘗以部民遇之弘治中卒年六十三所著有西村集西村雜言小雅日抄禮疑禮纂等書按明史建文諸臣傳後云萬歷時江南有致身錄云得之茅山道書中建文時侍書吳江史仲彬所述紀帝出亡後事甚具仲彬與

程濟等皆從亡之臣一時士大夫信之給事中歐陽調律上其書於朝欲為請諡立祠然考仲彬實未嘗為侍書錄蓋晚出附會不足信其說蓋本之錢謙益致身錄考董爾基續吳江志據致身錄為彬傳云帝遜位彬從行既而歸家帝常至其所輒隱之不以告人一日明古生適駕至賜名曰鑑潘樞章以吳寬所撰墓誌及鑑家狀考之乃知彬以稅長洪熙中嘗上書闕下蓋富而好俠者且未曾入仕何論從亡因力辨致身錄之為偽撰與明史及謙益之言合今故不立傳而附考於此

徐琛字文玉父真正統中以吏起家為麗水縣丞在官十八年進階文林郎致仕真職董銀鐵垂橐而歸人以是難之琛家貧教授於鄉門生有餽粟者琛以生學業未成辭不肯受景泰五年貢入太學成化中授泰寧知縣廉謹慈惠不尚刑罰有馴鳥巢其庭久之乞歸泰寧人祀之

已上並松陵文獻

吳洪字禹疇孝子璋之子也成化十一年進士授南京刑部主事精於法比多所平反歷郎中久之擢貴州按察副使以喪歸服除起廣東巡視海道兼攝鹽政皆號利藪洪獨無所染御下不少貸宿弊頓革御史王哲欲葺諸公署而難其費洪建議以為鹽法引納官錢若干向為權豪所專今請以給商使輸直可佐役從之費遂給鎮守中官初役四水驛舟各一久乃令輸金後又併徵其舟御史汪宗器銳意革之且欲追所得金洪曰往者不可追第自今釐正勿病民足矣如其言中官帖服遷福建按察使建寧延平大水輒便宜賑貸汀漳軍餉缺盜賊蠶起取征商之美賑之士徭戍閩者有所索守

臣集三司議洪曰不與則致叛與之則為例不若以貸為名而姑與之眾皆稱善召為太僕卿遷工部右侍郎正德元年轉左侍郎理部務劉瑾用事怨劉大夏誣以罪欲殺之下大臣議惟洪與都御史屠應竣力辨之乃得解四年遷南京刑部尚書有寧河王鄧愈之後與其弟爭賜田者特瑾為援洪執法不阿瑾大怒勒令致仕洪曰吾志也遂歸凡十三年卒年七十八贈太子少保洪居官廉遇事有智畧而德量寬雅惠愛在人子孫顯者不絕

松陵文獻參王志堅傳 附錄徐志吳成者尚書吳洪僕也洪為諸生時赴舉南畿成驅驢取值以供旅費及洪為福建按察使有富人犯罪持千金賂成求為寬解成却不受白其故於洪竟置之法由是洪名益起人雅重之至今配食於吳氏家廟云

姚明字景昭家長橋之南號月橋居士重厚寡言笑工古今詩文有所作人爭傳以為式兼善書法成化十三年舉於鄉授貴溪知縣調南靖母喪歸會子坐事論死走京師訟之遇疾

卒有月橋遺稿

松陵文獻

趙寬字栗夫少聰慧有聲場屋成化十七年會試同郡吳寬主試得其卷大驚置第一授刑部主事歷郎中執法不撓在部十四年以明允稱出為浙江提學副使品鑑精敏凡七年士風為之一變遷廣東按察使卒寬為人平易閒雅人樂與交為文豐贍葩藻下筆數千言立就詩亦清俊以未嘗屬草多散佚僅存半江集十二卷同邑吳鋈字汝礪少不羈好學工

詩與寬齊名兼善書法成化二十三年進士授兵部主事歷員外郎郎中卒所著有懶溪集

姑蘇志徐志合纂

葉紳字廷縉吳江人成化末進士除戶科給事中改吏科歷禮科左給事中弘治十年太子年十七猶未出閣紳請擇講官教諭尋以修省陳八事斥中官李廣又劾尙書徐瓊童軒侯瓚侍郎鄭紀王宗彝巡撫都御史劉瓛張誥張岫等二十人乞賜罷斥而未言去大奸則專劾李廣八大罪誑陛下以燒煉而進不經之藥罪一爲太子立寄壇而與煖疏之說罪二撥置皇親希求恩寵罪三盜引玉泉經繞私第罪四首開倖門大肆奸貪罪五太常崔志端真人王應禱輩稱廣爲教主

真人廣卽代求善官乞賜玉帶罪六假果戶爲名侵奪畿民土地幾至激變罪七四方輸納上供威取勢徇致民破產罪八內而皇親駙馬事之如父外而總兵鎮守稱之爲公陛下奈何養此大奸於肘腋而不思驅斥哉御史張縉等亦以爲言帝曰姑置之踰數月廣竟得罪飲醜死紳又極陳大臣恩蔭葬祭之濫下所司議頗有減損擢尙寶少卿卒

明史初弘治

七年吳中大水民飢紳奉使閩浙過家因上言國家糧餉仰給東南頃蘇松諸郡水道湮塞甚爲農患乞命官往治之于是遣工部侍郎徐貫往經理其事人咸德焉孫可成字懋學嘉靖二十四年進士知山陰縣胡宗憲留之幕府多所贊畫

擢南京工部主事謫蒲州同知免歸

松陵文獻

王哲字思德弘治三年進士授御史巡按廣東南海十三村負固為亂哲率知府詣其巢諭以禍福遂解散又請自後邊省之民凡有罪應遷口外者乞發近衛為軍下所司議行之再按江西鎮守太監董讓怙勢驕縱匿盜賊不以聞哲首劾其不法事上切責讓且以治盜事付哲哲嚴督有司遂擒渠魁天旱哲親錄囚平反數百人翼日雨是秋遂稔又善斷疑獄民為之謠曰江西有一哲六月飛霜雪天下有十哲太平無休歇遷山東副使進廣東按察使擢南京右僉都御史江西盜起奉敕巡視南贛汀漳斥貪吏去苛政盜皆斂迹尋改巡

撫宸濠憚之投以鴆毒幸不死遂以疾乞歸踰年卒

松陵文獻

盛應期字思徵吳江人

邑志御醫寅四世孫

弘治六年進士授都水主事

出轄濟寧諸牐太監李廣家人市私鹽至濟畏應期投鹽水中去會南京進貢內官誣應期阻薦新船廣從中搆逮應期下詔獄謫雲南驛丞稍遷祿豐知縣正德初歷雲南僉事武定知府鳳應死其妻攝府事子朝鳴為寇應期單車入其境母子惶怖歸所侵策鳳氏終亂奏降其秩設官制之寢不行後卒叛與御史張璞副使晁必登抑鎮守太監梁裕劾三人俱逮下詔獄璞竟拷死會乾清宮災應期得復職四遷至陝西右布政使擢右副都御史巡撫四川討平天全六番招

討使高文林會泉江燹蠻普法惡作亂富順奸民謝文禮文義附之法惡死指揮何卿等先後討誅文禮文義應期資銀幣以憂歸嘉靖二年起故官巡撫江西宸濠亂後瘡痍未復奏免雜調緡錢數十萬請留轉輸南京米四十七萬銀二十萬以食饑民又令諸府積穀備荒至百餘萬尋進兵部右侍郎總督兩廣軍務將行籍上積穀數帝以陳洪謨代而獎賚應期後洪謨積益多亦被賚應期至廣偕撫寧侯朱麒督參將李璋等討平思恩土目劉召復賚銀幣朝議大征岑猛應期條上方略七事言廣兵疲弱不可用麒等恚御史許中劾應期暴虐麒等因相與爲流言御史鄭洛書復劾應期賄結

權貴應期已遷工部侍郎引疾歸六年黃河水溢入漕渠沛北廟道口淤數十里糧艘爲阻侍郎章拯不能治尚書胡世寧詹事霍韜僉事江良材請於昭陽湖東別開漕渠爲經久計議未定以御史吳仲言名拯還卽家拜應期右都御史以往應期乃議於昭陽湖東北進江家口南出留城口開濬百四十餘里較疏舊河力省而利永夫六萬五千銀二十萬兩尅期六月工未成會旱災修省言者多謂開河非計帝遽令罷役應期請展一月竟其功不聽初應期請令郎中柯維熊分濬支河維熊力贊新河之議至是亦言不便應期上章自理帝怒詔與維熊俱奪職世寧言新河之議倡自臣應期尅

期六月今四月功已八九緣程工促急怨讟煩興維熊反覆  
變詐傾大臣誤國事自古國家債大事必責首議臣請與同  
罷帝不許後更赦復官致仕卒應期罷後三十年朱衡循新  
河遺跡成之運道蒙利焉明史

曹鏐字良金弘治六年進士選庶吉士授刑部主事恤刑四川  
多所平反進員外郎性鯁介遇中貴人必折辱之坐是左遷  
東昌府通判時鎮守太監在臨清者尤暴橫鏐抗章劾其罪  
狀因言伏讀陛下登極詔書凡鎮守內臣非舊制者奏聞裁  
革臨清州止有一衛官不滿十數軍不滿三千有兵備副使  
以坐鎮其地矣守備之設尙爲冗濫何必又增鎮守以遺民

患乞敕兵部遵詔裁革名還內臣武宗從之劉瑾怒使人刺  
鏐陰事無所得乃解遷興化府同知都司劉全瑾族也恃勢  
不法鏐舉按其罪降千戶已鏐擢湖廣僉事甫去而全卽藉  
瑾力復舊職鏐聞嘆曰時事至此何仕爲遂乞休與顧應祥  
文徵明諸人游爲詩文不尙雕琢又工繪事於所居積土爲  
山植桐其上自號桐邱卒年九十三

陳天祥字元吉其先隸籍武功衛弘治九年進士授青州府推  
官入爲御史遷西安知府歷山東副使整飭天津時流賊劉  
六等聚衆轉劫天祥嚴號令守要害獲渠魁及其黨七十餘  
人以功加太僕少卿時朝命都督張俊率精銳援天津天祥



與夾攻俘斬甚衆進左僉都御史賊平徵還巡撫貴州洞苗亂天祥發漢土兵攻破諸寨禽斬六千餘級捷聞賜金幣宣大有警命總督軍務寇遁進左副都御史改督陝西三邊尋奉命理閩浙鹽道過吳江卒於家天祥警敏有才略臨事能斷所至有聲在天津功尤著

已上並松陵文獻

周用字行之吳江人弘治十五年進士授行人正德初擢南京兵科給事中父憂服闋留補禮科已乞南改南京兵科諫迎佛烏斯藏及以中旨遷黜尚書都給事中等官且請治鎮守江西中官黎安罪出爲廣東參議預平番禺盜有功歷浙江山東副使擢福建按察使改河南右布政使代監司鞫南陽

滯獄獄爲之空嘉靖八年擢右副都御史巡撫南贛召協理院事歷吏部左右侍郎以起廢不當尚書汪鉉委罪僚屬乃調用南京刑部就遷右都御史工刑二部尚書九廟災自陳致仕用端亮有節概旣罷中外皆惜之頻有推薦久之以工部尚書起督河道數月改漕運未上召拜左都御史二品九年滿加太子少保二十五年代唐龍爲吏部尚書明年卒官贈太子太保謚恭肅

明史

陸鰲字鎮卿少從父役於京師弘治壬戌成進士授荊州府推官陞都水主事管徐州百步洪省夫役錢築石隄數千丈改監察御史督京東盜賊明年按山海關劾巡撫之不職者疏

籌邊三事悉見采納又按河南奪宣武等衛屯田為勢家所據者六千餘頃給諸貧軍歲增糧四萬石奏釋各府滯獄百數十人辨死刑之誣者六十人明年改知温州府郡民多訟鰲曰所以致訟者由求簡訟之速耳若一切不問民情將何以輸乃早夜聽斷不懈自是訟牒漸損台處寧紹飢流亡集境者賑之裁省無名冗費民困大舒温州濱海阻山絕商販荒政廢不講鰲令以穀贖罪三年穀盈八萬發府城三千丈闢通衢臨雁池以息火患陞浙江督糧參政為言官論歸自號釣雪散人又十五年卒年六十四

周用撰墓誌

出所藏經史閉門誦讀窮日夜不休三年學成從其師曹孚謁同郡吳寬沈周諸名公質疑訂惑必揮其底蘊而後已尤工於詩氣象風格力追唐人卒年僅二十九有傳響集十二

卷  
松陵文獻

吳山字靜之尚書洪子正德三年與弟巖同舉進士除刑部主事進郎中嘗錄囚江西平反疑獄以百計武宗將南巡偕同官上章諫詔跪殿廷五日杖三十擢山東副使遷陝西參政嘉靖初歷福建按察使江西布政使所至以廉靜長厚稱十年擢右副都御史巡撫河南以汴苦河患根極利害著治河通攷十卷伊王柔儒官豎縱恣臨漳府將軍祐棨招納亡命

剽民財所至人皆罷市山具以聞請薄責王俾自新而免祐  
 掠為庶人祐掠潛至京師誣山罪降浙江參議歷江西參政  
 應天府丞十五年以僉都御史巡撫四川明年進右副都御  
 史改撫南贛召為刑部左侍郎十九年進尚書時翊國公郭  
 勛以議大禮得幸怙勢作威為言者所劾下獄議者多觀望  
 持兩端山獨陳其罪狀論棄市帝內惜勛持其奏不下勛竟  
 瘐死獄中帝怒責山論讞後期免其官山即日就道卒於利  
 國監驛年七十三隆慶初復官贈太子少保巖字瞻之初為  
 行人遷工科給事中正德九年乾清宮災巖條上視朝講學  
 建儲及斥養子番僧罷邊兵中市凡十數事言甚切十三年

疏請召還部臣督民逋者又乞遣大臣治東南水利上從其

言遷四川參政卒

松陵文獻參葉  
變吳江縣志

王鑾字汝和吳江人隸籍錦衣衛正德六年進士試政吏部時  
 流賊甫平郡縣瘡痍未復鑾作原治二篇言今之盜賊皆由  
 守令監司惟利是視撫按又樂其趨承罔覈實效以致浸淫  
 潰敗故弭盜之本在禁奢立禮敦教懲貪而已尚書楊一清  
 異之補文選主事持正不妄交遷考功員外郎朝退扃戶人  
 罕見其面進驗封郎中與同官張衍瑞等合疏諫南巡被杖  
 創甚寢疾踰年卒

舒芬梓  
溪集

陸金字德如正德丁丑進士授工部主事歷員外郎中出知漳

州府郡故有海舶通番守給商引則往來無阻或倚以為盜  
 例得重賂金始至廉得其弊痛革之海中劇盜黃日金倡眾  
 將攻城勢張甚金勦捕平之漳人多為盜掠沿海諸郡温人  
 有當路者屬金盡殲其眾金恐株累無辜不從遂罷官尋陞  
 江西按察司副使卒金歷官二十年矢志清白守漳惠政尤  
 著林居終日杜門做廬數椽不加營葺至今人稱其清

沈漢字宗海吳江人

父奎字天祥以孝友聞  
 事詳周用所撰墓誌

正德十六年進士

授刑科給事中中官馬俊久廢忽自南京召至漢論止之改  
 元詔書蠲四方逋稅漢以民間已納者多飽吏橐請已徵未  
 解者作來年正課又言近籍沒姦黨資數千萬請悉發以補

歲入不足之數皆報可嘉靖二年以災異指斥時政尚書林  
 俊去位復抗章爭之戶部郎中牟泰坐吏盜官帑下詔獄貶  
 官漢言吏為姦利在泰未任前事敗泰發之泰無罪因極言  
 刑獄宜付法司毋委鎮撫不納張寅大獄起法司皆下吏漢  
 言祖宗之法不可壞權倖之漸不可長大臣不可辱姦賊不  
 可赦遂并漢收繫除其名家居二十年卒隆慶初贈太常少

卿明  
 史

陳理字君明同里人少為諸生器岸軒特文筆雄健正德中提  
 學御史張璿行部再試皆第一命擬作請立先賢子游後奏  
 記理援筆立就璿稱善五舉鄉試不第而卒嘗修縣志未就

有同川集宋元遺事陳氏族譜四禮規諸書藏於家舊縣志

姜元字元仲吳江人少博學嗜酒不就博士弟子試與邢參游

慕好之居湖濱足未嘗輕詣人或使其子弟學焉亦時謝遣

之朝起視益中粟稍可炊即閉戶吟誦歲中所遇相善者率

不出百里晚年善黃魯曾徐鱗魯曾蓋師事徐姜也徐詩尚

華美姜務雅澹極意陶鍊每成一詩輒復捐去着思再三芒

藻幾盡不為時流所知或諷其少貶執道愈堅以知希為貴

蓋亦詩家之逸民也列朝詩集

毛衢字大亨嘉靖二年進士授太平知縣調永康俗勁悍前令

為民所訐坐繫獄衢至縛訐者至階下杖殺之乃視事奸民

震恐邑中大治遷刑部主事擢四川僉事進提學副使所獎

拔多知名士卒於官衢性伉直所至禁戢強暴甚有威惠工

文章操筆立就子圖南壽南並舉進士壽南字宇徵為山陰

知縣時浙東諸郡勾餘軍漕運壽南建議永折遂為著令又

築隄麻溪壩以捍外潮民賴其利松陵文獻名拜御史以疾請歸

卒壽南子以燧庚子舉人官副使有詩名以焯甲辰進士兵

部郎中葉志

陳策字獻可博極群書為詩文冲暢典核嘉靖改元領鄉薦授

曹縣學教諭卒於官繼妻丁氏撫尸慟哭嘔血數升次日亦

卒曹人異之所著有說鈴九華集東行集曹縣志松陵文獻

張銓字秉道世居越來溪嘉靖元年舉於鄉選膠州知州歲飢羣不逞剽劫爲亂銓禽首惡數人寘之法餘悉解散因言於朝蠲常賦之半民用安集尤篤意教化修學宮選諸生俊茂者親爲講說經義有古循吏風遷南安府同知嘗攝府事又攝南康信豐二縣所居職辦上官知其能數使治煩劇後入覲道卒年五十二銓風格高整機鑒精明通達世務爲詩文雄壯激烈慨然有經世之志惜未究其用有尊江存稿二卷

松陵  
文獻

沈啓字子由嘉靖十七年進士授南京工部主事世宗將幸承天南都有司未知水陸所從欲預備龍舟以待又恐上或從

陸徒耗金錢尙書周用以問啓啓曰名商庀材於龍江關急驛偵上所從道興工未晚也已而果從陸中都內臣請修皇陵意以規利啓與錦衣朱某往視諷之曰高皇帝制皇陵不得動寸土違者死今修之當奈何朱某色動見中官具道之乃止修壩垣以報先後所省以巨萬計改刑部歷員外郎中出爲紹興知府巡撫朱統嚴禁海舶而郡豪紳利互市陰與通以啓能得統意屬爲解之持美遷啖啓啓不聽遂深銜之遷湖廣副使督撫侍郎張岳討黑苗寨屬啓紀功時官兵多縱殺邀賞啓令獲生口與斬級同全活者衆竟坐紹興時事罷歸而統被陷亦自殺啓歸絕口不言官事築室仙人山以

著述自娛卒年七十八啓身若不勝衣而神采高朗博覽羣籍凡陰陽律歷五行水利之學靡不研究喜爲詩所著有南廠南船二志牧越議畧吳江水利考及家居諸集數百卷子察字體中博學能詩文自左氏離騷而下多所擬作舉嘉靖十三年鄉試早卒有少虛稿孫季文字少卿萬歷五年進士由工部郎中歷陝西督學副使福建督糧參政四川按察使山西山東布政使擢副都御史巡撫河南嘗發粟三千石賑鄉人邑中德之

松陵文獻  
參葉志

張基字德載名犯宣宗諱以字行銓之子性至孝嘉靖十九年舉於鄉例得坊金一日散宗黨畧盡父銓卒南安德載千里

奔喪哭踊幾絕服滿當試念大母陳年高不赴大母卒尋以避倭奉母入郡旣再試不第遂屏冠服爲野人裝題其室曰愛日朝夕不離母左右於書無不窺尤邃於經術晚益究心主敬之學多所自得羅洪先倡道江右聞其篤志特遣門人遠來就正咸歎服去所著有孝經附註讀書疑獨鑒廣頤諸書隆慶元年詔求山林遺逸撫按交薦不應歲大祲有米數百斛悉以賑飢屬軍興族人苦重役德載曰吾何忍獨以例免爲請於官毀家產代之預刻死期端坐而卒年五十九學者私謚曰靖孝先生崇禎十年御史祁彪佳表其德行贈翰林待詔

李濟字民望麻溪人父璇遊疾危濟年十三卽割股作羹以進  
璇遂愈又三十年乃終濟居母喪廬墓三年不入私室督學  
御史蕭鳴鳳命食餼以風學者嘉靖二十一年以貢爲衡州

府訓導

已上並松陵文獻

皇甫渙字時亨吳江人嘉靖丁未進士除南昌知縣內艱服闋  
補固安皆著能聲轉刑部主事進員外郎出爲廣東僉事備  
兵嶺西苗民張璉嘯亂煥討平之擢參議駐惠潮賊林朝曦  
復圍程鄉開門納郊外民夜出師爲奇兵賊疑援至遁匿陰  
那大山山險莫可搜坐困之生獲朝曦而還功上奸黨持之  
僅加一級卒坐劾歸里亡何起參政先疽發卒所著有蓮塘

漫筆

董爾基續吳江志

徐師曾字伯魯沈深好學嘉靖二十六年舉禮部以父母年高  
不對策而歸父歿後始成進士選庶吉士轉兵科給事中母  
喪歸起補吏科所建白多切時務晉左給事中時嚴嵩父子  
用事言路多失職遂引疾歸闕書舍南湖上講誦如諸生時  
萬歷初以薦起禮科固辭晚年覃思著述所著有周易演義  
禮記集註正蒙章句世統紀年湖上集文體明辨大明文鈔  
宦學見聞吳江志小學史斷經絡全書六科仕藉凡數百卷

卒年六十四

史元曰往時禮記但用陳澔集說師曾以爲未盡善始鳩集羣儒潛心講誦積數十年撰爲集

註功加於澔其學至今通行之先是莫旦史鑑陳理皆爲縣志至嘉靖中世及事邇文尤繁猥師曾以爲不足經遠重作



吳江志綜討舊章號爲良史

吳邦楨字子寧刑部尙書山子嘉靖三十二年進士除刑部主事進郎中擢湖廣按察使時荆襄大水潰隄亘七百里邦楨出贖緩補之如故龍潭蠻黃中據施州爲梗楚蜀間咸受其害又土酋葦宇恃險遠焚掠邦楨一撫一討功尤著忌者沒之僅賞金綺遷甘肅行大僕卿尋改陝西致仕卒

顧會唯字一貫同里人嘉靖三十二年進士授金華知縣縣故倚郭里甲困於供億會唯悉裁冗費性廉明庭無留獄倭寇温台有自白馬驤嶺入永康武義境者會唯督民兵守要害倭不敢犯縣學素隘爲買地拓之遷御史巡按廣西奏遣安

南貢使之久留境上者宗室有犯法者抗章劄之自是豪右屏跡以大父年高請告歸會唯性友愛推故廬與族人共居至四五世猶不改云

周大章字一夔邑人多好經術而大章獨明兵法嘉靖三十一年舉於鄉明年三月倭猝犯青陽港知縣楊芷請爲參謀部署子弟以飛艦斷其上流斬首十八級生禽五人吳人始有戰志三十三年六月倭自崑山掠閬門南下大章以輕舟邀之斬首十六級明年正月復禦之平望斬首十一級當事偉其功先後賚以銀幣不受巡撫周琬檄守朱涇踰年乃罷論功當授官大章以養親辭乃官其子崇仁蘇州衛千戶世襲

後大章為餘姚教諭會瑞安被倭患吏部遂以大章知瑞安縣縣城庳陋乃鳩眾築城九里門皆有樓周以雉堞倭不敢逼卒於官有文藝集及禦倭賦畧弟大韶嘗從大章參謀幕府立功海上尤精水利之學萬歷五年巡按御史林應訓議開東南水利引大韶與共事所著有水利節畧兵家緒言已上

並松陵文獻

杜偉字道升少育於沈漢家從其姓後歸宗偉幼有至性祖母目瞶以舌舐之而愈七歲喪母每哀啼父亦感泣偉乃破涕為歡陰察之哀益甚也嘉靖壬子舉於鄉其學務主靜而尚躬行動止皆有法度脩換羅洪先家居講學聞偉名延為子

弟師嘗過鄱陽湖大盜猝至偉端坐自如既而知為偉也羅拜而去自以受沈氏厚恩漢孫位官翰林死於漕卒之難偉經紀其家白兵備蔡國熙置悍奴於法卒保其孤已而累舉不第謁選得南陽府推官專務以德化民考最遷工部主事權荊州關盡弛商人法外征以稅課不及額遂引疾歸所攜惟圖書數卷舟中見木桶叱其家人曰此非荊州物耶立投之江既歸終日默坐至貧困不給年七十一卒學者稱靜臺先生偉學不由師傳而踐履純篤不愧真儒所著有順性學聚二錄正學編靜坐訣四書筆記諸書松陵文獻葉志合纂

沈位字道立漢孫嘉靖甲子舉鄉試第一戊辰成進士選庶吉

士授檢討赴京為漕卒所傷卒於道位居家善事後母與弟  
倬友愛調族贍友不蓄餘資早游唐順之茅坤門工古文詞  
惜天促之年未見其止

舊府志參朱鶴齡松陵文徵

潘志伊字伯衡嘉靖四十四年進士授定州知州萬歷二年為  
刑部郎中先是隆慶末有錦衣指揮周世臣者外戚慶雲侯  
裔也家貧無妻獨與婢荷花兒居盜入其室殺世臣去把總  
張國維入捕盜惟荷花兒及僕王奎在遂謂二人姦弑其主  
獄成志伊疑之久不決會左侍郎翁大立署部事憤荷花兒  
弑主趣志伊速決志伊終疑之乃委郎中王三錫徐一忠同  
讞竟無所平反置極刑志伊尋出知九江府踰數年獲真盜

都人競稱荷花兒冤流聞禁中帝大怒欲重譴大立等會給  
事中周良寅蕭彥復劾之乃追奪大立職調一忠三錫於外  
志伊亦謫知陳州後歷南昌知府袁州兵備副使陝西行太

僕寺卿終廣西右參政所至有聲

明史參松陵文獻

王叔承字承父自號崑崙山人少孤受博士業以好古謝去貧  
贅婦家為婦翁所逐不予一錢乃攜婦歸奉母貧益甚所善  
商生為叔承謀曰吾聞趙王賢而好客謝榛鄭若庸皆在盍  
往游乎乃與俱之鄴至則問知王雖好客客見必蒲伏稱主  
臣叔承弗屑也會生病死葬之銅雀臺下因北入京師客大  
學士李春芳所使草應制祝釐之作叔承謝弗能第為草遊

仙數章上覽而異之於是春芳大喜延之直所得縱觀西苑南內之勝作漢宮數十曲流聞禁中而以其間與范應期顧養謙陳以忠胡淳輩定交於公車叔承皆弟畜之相與悲歌縱酒久之乃謝歸縱游吳越各山水作吳越游編入閩作荔子編過楚作楚遊編養謙開府漁陽要之塞上作嶽遊編而歸遂不復出卒年六十五叔承飲可一石有古人之誼淳以直諫死叔承慟哭經紀其喪且振業其二子太倉王錫爵亦布衣交也再召會有三王並封之議叔承遺書數千言謂當引大義以去就力爭不當依違兩端負主恩辜物望錫爵亦歎服焉其詩豪宕莽蒼天才爛發取爲王世貞兄弟所推云

列朝詩集參  
松陵文獻

孫從龍字汝化隆慶二年進士授行人遷刑部郎中錄囚廣西多所平反尤加意永戍曰古者罪不孥况世世乎一人負冤災及子孫是重於大辟也出知廣信府廣信當孔道素苦供億從龍力行儉約減常費大半遷江西副使引疾歸生平學問得之易爲多著參疑內外編卒年六十三子履恒萬歷二十二年舉於鄉終博羅知縣好言兵事有武經商隲數卷顧大典字道行祖曷字仲光正德十二年進士授將樂知縣民爲立碑表德官至汝寧知府大典讀書過目成誦喜爲古文詞又善繪事能詞賦隆慶二年舉進士爲紹興府教授歷南

京吏部郎中遷山東副使改福建提學副使較文精嚴請託不行忌者中以考功法謫禹州知州自免歸所著有清音閣

集海岱吟閩游草園居稿

松陵文獻

吳秀字越賢隆慶五年進士授刑部主事歷員外郎中出知九江府巡按御史檄下司理勾稽贖鍰至三千金秀請除其十之八鑿龍開湖得良田三千頃又鑿老鸛河便商賈泊宿時為之謠曰民不死吳公是子客如歸風伯無威改知揚州復五塘建義倉為民永利遷福建副使被劾免後列烏程鄉賢

祠

松陵文獻

蘇州府志卷六十四 終

蘇州府志卷六十五

人物十九

吳江縣

明

沈璟字伯英漢曾孫萬歷二年進士授兵部主事歷禮吏二部員外上疏為王恭妃請封號忤旨降行人司正遷光祿寺丞以疾乞歸二十餘年卒璟在部時留心邊事詢訪人才晚習為和光忍辱改字聃和精於六書兼通樂府自號詞隱生天啓初追錄國本建言諸臣贈光祿寺少卿

沈瓚字子勺璟弟萬歷十四年進士授南京刑部主事進郎中出為江西僉事居二年乞歸年僅三十七耳家居十八年以

薦起補廣東僉事甫入境病卒瓚孝友能周人之急立義莊  
贍族事兄璟如父庶叔佐坐冤獄悉力營解又撫其孤分產  
與之平居未嘗以笱牘入公府有年家子爲家奴所陷坐重  
辟瓚知其枉爲白之縣時知縣劉時俊清嚴絕請託素敬瓚  
爲立出之且露封荅曰使百姓聞吾過也

以上松陵文獻

袁黃字子儀萬歷十四年進士授寶坻知縣邑諸役倍於田賦  
車運皇木役爲甚黃建議請由會通河運入移皇木廠於三  
賢祠北使濱水受木便臺使爲奏報可因盡革重夫重馬採  
石箭手諸役潞藩之國鄰邑科斂爲公費水淺舟膠留頓則  
費逾廣黃令囊沙壅下流水滿則舟易達及舟將至則啓囊

沙更壅其下不移日越境去邑地窪下苦潦黃浚三岔河築  
堤捍之海水時溢入爲患令岸上多植柳高數尺潮退沙遇  
柳輒淤漸成堤因於堤內開溝塍課耕種曠土大闢擢兵部  
職方主事倭躡朝鮮經略宋應昌疏請黃贊畫軍前訪求奇  
士得山陰馮仲纓吳人金相置幕下時朝廷方遣辯士沈惟  
敬入倭營議封貢罷兵倭酋行長許之與提督李如松約以  
明年正月入平壤受冊退師黃以問仲纓相兩人策如松必  
借封期以襲平壤襲而克則敗封旣克而驕又必大敗正月  
如松果襲平壤入之所部兵割麗人首以獻功黃面數如松  
以襲封殺降之罪如松大恨已而如松大敗於碧蹄館黃乃

告應昌遣仲纓往說倭會清正約盟解兵事垂成而如松以  
 十罪列黃黃遂中察典免歸家居十餘年卒年七十四天啓  
 改元追敘東征功贈尙寶司少卿黃博學尙奇凡河洛象緯  
 律呂水利河渠韜鈴賦役屯田馬政以及太乙奇門六壬岐  
 黃勾股堪輿星命之學莫不洞悉原委著書甚富今所存者  
 兩行齋集歷法新書羣書備考子儼有文名天啓五年進士  
 授高要知縣未幾卒

松陵文獻  
葉志合纂

吳默字因之兄之勇以經學名默獨好靜悟讀書古寺每循几  
 夜行明發復危坐萬歷二十年會試第一授兵部主事歷禮  
 部郎中遷尙寶司丞進少卿舊制璽卿班在詞臣前已漸失  
 其初默毅然建議復之改通政司參議歷左通政擢太僕寺  
 卿以病免崇禎中卒年八十七默立朝最淺遷除皆不赴職  
 然時論高之每會推必首及云初吳江知縣劉時俊以漕卒  
 鼓譟爲淮撫李三才所劾默方官尙寶素聞時俊賢爲訟言  
 於朝吏部尙書孫瑋竟用默議僅奪時俊俸二月而默卒不  
 令時俊知也晚徙家吳門是時縉紳文震孟姚希孟舉人朱  
 陞宣張世偉楊廷樞輩並以文章氣節重鄉里默恒爲之首  
 巡撫以下時造請其門民開利病知無不言然性褊急不能  
 容人之短以疑出其繼妻箠其子至死議者亦以此疵之

松陵  
文獻葉  
志合纂



沈琦字仲玉漢曾孫少孤卽有成人之度訓二弟琬琿肅如嚴師萬歷二十三年與琬同舉進士後十年琿復繼之時以爲榮琦初授淄川知縣稅監方恣橫守令觸之立碎琦將至先白上官曰彼來琦必不令得志請以身當之又宣言於吏士曰母老身病方借此求歸耳稅監聞之逡巡不入境民有訟者片言立決凡二年間惟一囚坐贖後徙高陵三原入覲還託病卧陰令健卒四出盡縛稅監用事諸參隨寘之法皆駭服不敢動以禮部主事徵入尋卒

松陵文獻

沈琬字季玉甫釋褐以母老乞歸養母卒服闋補鳳陽教授轉南京國子學正遷南京刑部主事歷郎中出知東昌府爲政

清簡擢山東副使萬歷四十三年山東旱蝗大飢巨盜劉好問等聚衆爲亂僚屬畏禍各託故去琬兼數篆發廩振給禽盜魁斬之招集流移置常平倉立義冢明年麥大熟乃乞致仕歸琬好禪理少時欲爲僧兄琦禁之乃止每之官必與櫬自隨布袍蔬食卽俸金亦貯庫不入署舍家旣貧官刑部時值吳中大祲諸子皆緣岸采蕪菁煮食自給晚年屏居吳山從牖隙中度飲食家中子弟罕見其面人謂其廉介不減吳隱之云珣字幼玉初授中書選御史累官副都御史巡撫山東議增兵設防及戢劉興治亂軍具有方略時以珣與兄琦琬稱沈氏三鳳珣子自繼自微自炳自然自駟自南皆有名



自繼字君善工詩文性耿介隱居終身自徵字君庸好兵家  
言慕魯仲連為人居京師為樞臣說督師袁崇煥入朝久之  
歸出橐中金市田給昆弟宗族性穎悟絕人為文立就不錄  
稿多散自炳以下 琬從子士哲字若宇萬歷乙卯舉人官南

康知縣以孝友稱松陵文獻  
參葉志

張尚友字益之基之子為諸生精春秋之學吳中治春秋者皆  
宗之事父純孝父病革刲股和糜以進人有欲上其事者尚  
友怒曰是欲我以死父取名乎狀苟上我必死之尤以氣節  
自勵常熟趙用賢以諫張居正奪情廷杖尚友重其人及用  
賢再召送以序頌而能規卒年五十八有遺文八卷錢謙益  
表參姚

希孟  
狀

俞安期字羨長吳江人徙陽羨老於金陵巨目曷鼻魁顏長身  
狀貌如河北儉父與之談盱衡抵掌意氣勃如也少客於龍  
君揚受國士之遇君揚被譴入楚慰之遣戍永安又入豫章  
送之與楚人丁元甫為意氣之交元甫歿厚遇其子海內歸  
義焉嘗為長律百五十韻投王世貞世貞為之傾倒先是邑  
中王叔承以布衣游公卿間名籍甚安期後起名遂相亞叔  
承雖好山水然守母遺訓未嘗遠游安期一出十年周覽五  
嶽所至觴酌流行絲肉並奏酒酣坐嘯聽者皆歎其有鸞龍  
之音又多技能好相人宅冢沾沾自喜有粲粲集數十卷子

南史字無殊亦工詩和雅冲澹類其為人

列朝詩集參  
松陵文獻

周道登字文岸吳江人萬歷二十六年進士由庶吉士歷遷少

詹事天啓時為禮部左侍郎頗有所爭執以病歸五年秋廷

推禮部尚書魏忠賢削其籍崇禎初與李標等同入閣道登

無學術奏對鄙淺傳以為笑御史田時震劉士禎王道直吳

之仁任贊化給事中間可陞交劾之悉下廷議吏部尚書王

永光等言道登黨護樞臣王在晉及宗生朱統飾鄉人陳于

鼎館選事俱有實跡乃罷歸閱五年而卒

明史 按明史於  
道登貶斥如此而

初陵文獻言其事兄如父門庭肅穆篤於親故居官廉慎自

將以不善附和為黨人所嫉惟恩怨大明論者或少其量葉

志亦言道登自掌禮曹至入相朝廷屢有恩蔭皆堅辭裁冒

濫杜請謁故忌疾者眾蓋道登固無才略猶不失為戇直而

是時黨局紛爭人  
言亦未可盡信也

趙士諤字憲卿寬從曾孫萬歷二十九年進士授會稽知縣政

務清約姦民妄言富順永昌有礦金稅監將行開采士諤以

宋諸陵所在力持不可浚淤浦數十里溉田萬餘畝民以趙

公浦名之入為職方主事調吏部考功司改文選累進郎中

四十五年主京察時吏科都給事中徐紹吉掌河南道御史

韓浚欲斥行人劉宗周士諤獨言昔令會稽時嘗至宗周家

親見其清操絕人不當掛吏議由是宗周得免黜遷太僕少

卿明年擢僉都御史巡撫宣府額兵八萬素多虛冒而是時

急徵兵援遼宣府獨倍他鎮士諤三上章力持之未報會總

兵劉孔穎憚行兵大譁士諤乃宣所上章諭以朝廷威德斬其渠以徇尋引疾歸

松陵文獻  
參新志

莊元臣字忠甫萬歷三十二年進士授中書舍人尋卒元臣學無所不窺喜談經濟每閱一書必劈肌解族扼要鈎元其爲古文辭經營極苦會意所至千言立就因爲文論以明古今作者之得失所著有叔苴子覺參符三才考略金石謨鳳閣草時務策凡數百卷兄憲臣字昆明亦博雅士也

松陵  
文獻

孫養正字聖功萬歷三十二年進士授興化府推官精聽斷訊獄得情嘗設善惡二籍朔望令保甲條報民間事備書其上亡得謾語異時有告言者取籍視之具知其人本末攝莆田事詔蠲是年賦額十之一吏具牒概徵叱曰壅天子德意令百姓困誅求爾輩罪足贖耶竟如詔書亡何卒官人咸惜之

松陵文獻  
云見閩書

沈正宗字因仲萬歷丁未進士授工部主事轉員外郎時無錫顧憲成倡東林書院與士大夫講學御史徐兆魁具疏力攻之光祿丞吳炯疏辨不報正宗上言兆魁巧誣憲成已經吳炯據實疏明臣所嗟憤不平者惟是國釀空虛之禍人進禁錮之謀天下方痛衆君子之易退兆魁則惟恐一君子之或進漢唐宋末季之禍奈何復蹈其轍乎願皇上察治亂之幾審賢奸之路立名憲成等赴闕速諭兆魁等剖疑釋猜執政

疾之辛亥京察以浮躁降調丁內外艱補浙江布政司理問未赴轉兵部主事天啓中忤璫削籍崇禎初起故官歷河南參議流賊混十萬曹操整齊王分道寇河南正宗率所部六千人擊敗之疏言流賊宜勦不宜撫條上方略甚悉尋致仕

歸葉志

周宗建字季侯尙書用曾孫萬歷四十一年進士除武康知縣調繁仁和有異政入爲御史天啓元年遼事方棘上疏責備輔臣無何瀋陽破宗建責當事大臣益急因請破格用人召還熊廷弼是歲冬奉聖夫人客氏旣出官復入宗建首抗疏極諫忤旨詰責明年廣寧失廷臣多庇王化貞欲甚熊廷弼

罪宗建不平爲剖兩人罪案頗右廷弼諸庇化貞者乃深疾宗建京師久旱五月雨雹宗建謂陰盛陽衰之徵歷陳四事一專譏大學士沈淮一請寬建言廢黜諸臣一言廷弼已有定案不當因此羅織朝士陰刺兵部尙書張鶴鳴給事中郭鞏一則專攻魏進忠略言近日政事外廷嘖嘖咸謂奧窔之中莫可測識諭旨之下有物憑焉如魏進忠者目不識一丁而陛下假之噓笑日與相親一切用人行政墮於其說東西易向而不知邪正顛倒而不覺況內廷之借端與外廷之投合互相扶同離閒之漸將起於蠅營讒構之釁必生於長舌其爲隱禍可勝言哉進忠者魏忠賢故名也時方結客氏爲

對食廷臣多陰附之其勢漸熾見宗建疏銜刺骨未發也鄒元標建首善書院宗建實司其事元標罷宗建乞與俱罷不從巡視光祿與給事中羅尙忠力剔奸弊節省爲多尋請核上供器物中官怒取旨詰責宗建等再疏力持中人滋不悅給事中郭鞏者先以劾廷弼被謫廷弼敗復官遂深結進忠知進忠最惡宗建乃疏詆廷弼因詆朝廷之薦廷弼者而宗建與焉其鋒銳甚南京御史涂世業和之詆宗建誤廷弼且誤封疆宗建憤疏駁世業語侵鞏抉其結納忠賢事鞏亦憤上疏數千言詆宗建益力并及劉一璟鄒元標周嘉謨楊漣周朝瑞毛士龍方震孺江秉謙熊德陽輩數十人悉指爲廷

弼逆黨宗建益憤抗疏力駁其謬當是時忠賢勢益盛宗建慮內外合謀其禍將大三年二月遂抗疏直攻忠賢略言臣於去歲指名劾奏進忠無一日忘臣於是乘私人郭鞏入都嗾以傾臣并傾諸異己者鞏乃剽爲新幽大幽之說把持察典編廷臣數十人姓名爲一冊思一網中之又爲匿名書羅織五十餘人投之道左給事中則劉弘化爲首次及周朝瑞熊德陽輩若而人御史則方震孺爲首次及江秉謙若而人而臣亦其中一人也旣欲羅諸臣以快報復之私更欲獨中臣以釋進忠之恨是察典不出於朝廷乃鞏及進忠之察典也幸直道在人鞏說不行始別借廷弼欲一寘陷之先朝汪

直劉瑾雖皆梟獍幸言路清明臣僚隔絕故非久卽敗今權璫報復反借言官以伸言官聲勢反借權璫以重數月以來熊德陽江秉謙侯震暘王紀滿朝薦斥矣鄒元標馮從吾罷矣文震孟鄭鄮逐矣近且扼孫慎行盛以弘而絕其揆路摘瓜抱蔓正人重足舉朝各愛一死無敢明犯其鋒者臣若尙顧微軀不爲入告將內有進忠爲之指揮旁有客氏爲之羽翼外有劉朝輩爲典兵示威而又有鞏輩蟻附蠅集內外交通驅除善類天下事尙忍言哉疏入進忠益怒率劉朝等環泣帝前乞自髡以激帝怒乃令宗建陳交通實狀將加重譴宗建回奏益侃直進忠議廷杖之閣臣力爭乃止奪俸會給

事中劉弘化御史方大任等交章劾宗建攻進忠鞏輩復力詆諸人詔下諸疏平議廷臣爲兩解之乃嚴旨切責奪鞏宗建俸三月是時劉朝典內操遂謀行邊廷臣微聞之莫敢言宗建乃抗疏極諫歷陳三不可九害會朝與進忠有隙事亦中寢其冬出按湖廣以憂歸五年三月大學士馮銓銜御史張慎言嘗論已屬其門生曹欽程誣劾而以宗建爲首并及李應昇黃尊素忠賢遂矯詔削籍下撫按追贓明年以所司具獄緩遣緹騎逮治俄入之李實疏中下詔獄毒訊許顯純厲聲罵曰復能詈魏上公一丁不識乎竟坐納廷弼賄萬三千斃之獄宗建旣死徵贓益急其所親副使蔣英代之輸亦

坐削籍忠賢敗詔贈宗建太僕寺卿官其一子福王時追諡

忠毅明史附錄舊志沈義者吳江市人業賣糕為人任俠仗義方周宗建被逮下詔獄僮僕無敢從者義獨慨然隨

侍周旋橐餗不避危險宗建死於獄惟義買棺親為含殮一時盛傳其事比於文文山之張義甫蘇松兵備馮元颺奇其人檄至麾下崇禎末元颺巡撫天津題授

都司加副總兵銜後隱居伏龍山而卒

張世偉字異度基之孫七歲喪母朝夕上食號慟塾中書生皆

為流涕總角明慧善屬文父尙友攜之游淩江王世貞錫爵

歎息以為國器及長聲名籍甚萬歷四十年舉順天鄉試出

新城王象春之門初黨議之起世偉扼腕樹頰多所題覈裁

量至是忌象春者并指摘及之坐罰三科累試不第謝公車

以老是時吳中文震孟姚希孟周順昌朱陛宣輩並以名行

相砥礪世偉皆與之友善希孟則其受業弟子順昌遭奄禍

世偉周旋經紀奮臂出入鄉邦有大利害搢紳相顧噤嚅者

必自世偉發之卜居吳門淶水園卻掃誦讀清談竟日樵蘇

不爨為古文辭取裁韓柳所著有自廣齋集卒年七十四友

人錢謙益私諡之曰孝節先生約錢謙益誌福王時禮部奏贈翰

林院待詔舊府志

朱鷺字白民初名家棟為郡諸生性至孝家貧授徒以養父頗


能詩好禪理隱居華山中寫墨竹售之以此自給公卿罕見

其面萬歷中議修正史鷺著論以為革除四年之事孫蒙祖

號死亂生年失無大於此者宜斷以史臣之權為建文帝立

本紀復其年隨錄其當時行事以存一代之典乃倣綱目作  
 建文書法儼其後言者數以為請上遂下詔復以建文紀年  
 其議實自鷺發之為人長身玉立風神閒遠崇禎初甘露降  
 於華山撰甘露頌欲詣闕獻之不果卒年八十松陵文獻  
 吳煥字文叔刑部尚書洪曾孫萬歷四十四年進士授海寧知  
 縣調仁和憂歸服闋補內黃縣行取入都會閣黨曹欽程誣  
 劾周宗建以煥同鄉又代令仁和疑有私鑄三級崇禎元年  
 召為御史首發太監崔文昇罪惡并及欽程疏甫上文昇即  
 結同黨伏宮門號哭聲震御座帝大怒並其黨皆杖一百充  
 孝陵淨軍下部議欽程罪詔毀三朝要典詞臣孫之獬固爭

煥抗章駁正之之獬坐廢尋出按陝西時秦中大飢邊軍多  
 去為賊攻掠西寧漢中勢漸張有司畏罪不以聞煥連疏糾  
 游擊龔其勝等主撫縱賊又請卹戰死千總王佐百戶劉爵  
 皆報可逾年改督遼餉而流賊益橫諸將不能制旋撫旋叛  
 皆如煥所料五年以病歸久之起為湖廣副使不赴卒松陵文獻  
 屠嘉賓字心益少孤祖大化鞠之及大化疾篤嘉賓密封股和  
 藥以進遂瘳母陳氏以哭夫喪明嘉賓舐其目久之復明萬  
 歷中巡按徐應登加獎續吳江志  
 陸文衡字坦持吳江人萬歷己未進士授工部主事出知福州  
 府不肯建魏忠賢生祠崇禎初陞浙江參政轉四川按察使





陞山西右布政以在蜀時郵符註誤降補河南副使分守洛陽時獻賊屢犯中州總理熊文燦倡招撫之議手出一疏令道將署名文衡獨以賊方猖獗撫之非宜不從文燦怒裂疏而起不三日賊果叛去畿南告警上從科臣議添設真保廣三道簡用材幹臣文衡與焉陞見奏言今日民窮財盡向來分派搜刮不可再行惟有清耗蠹一法餉自足用上不應而出尋丁內艱服除補薊州調濟南以父老乞終養遂不出卒於家

舊府志

葉紹袁字仲韶父重第進士仕至貴州僉事紹袁少有藻思工詩賦天啓五年舉進士選南京武學教授遷國子助教虞衡

主事以不耐吏職告歸妻沈宜修字宛君副使琬女工詩五

子三女並有文藻一門之中更相唱和此自娛遂不復出

乙酉後棄家入山自號粟庵嘗輯一時死節諸臣為書未就

而卒

松陵文獻

潘一桂字無隱一字木公父以賈僑居京口一桂少有詩名為諸生與鎮江章詔相引重念賦學衰廢乃杜門擬議與友人錢元密緯以閎博相砥礪作東征昌言諸賦為時所稱二十餘歸故里與卜舜年同學諷習楚辭其結撰愈工焉性嚴整非義不動崇禎五年唐世孫好詞賦延四方賓客起高明樓擬於雁池兔園以書幣相招再三辭之後遊襄陽世孫已立

爲王遣使迎候不絕於道一桂不得已乃往授簡賦詩雍容  
應教居留一月稱疾辭歸期年王廢同時在園中者皆株累  
坐法一桂獨以見幾得免卒年四十五有文集六卷古韻通  
考二十卷舜年字孟碩盛澤人有雋才又莊培字端甫亦能  
詩與舜年唱和最富

沈自然字君服琬子沈氏世有文采自然獨工歌詩有至性孤  
峭絕俗家貧雖蔬食不給閉門諷詠不輟於人少所許可竟  
以苦吟眉髮盡落居母喪神傷骨立數月而卒族人私謚孝  
介先生妻嚴氏素賢以痛自然故數月亦卒聞者無不傷之  
趙廢字任卿士諤從子以武舉爲金山營把總被劾革職崇禎

九年流寇犯安廬巡撫張國維拔爲守備屯太湖縣十年二  
月賊東下廢提兵禦之至雞飛灘遇賊三百餘騎擊卻之追  
奔抵通湖賊以百騎來山前挑戰廢據山爲營遣千總楊國  
鎮等以銳卒二百赴之射殺賊渠數人而賊潛從山後以千  
騎襲營廢力拒之手刃十餘賊以衆寡不敵被執不屈遂遇  
害部下李池等皆格鬪死事聞贈指揮同知子孫世襲總旗  
仍令太湖建祠祀之

盛王贊字子裁寅八世孫曾祖應陽嚴州太守王贊少貧苦依  
外家陽城張氏後徙郡城崇禎十年成進士授蘭谿知縣湯  
溪靛寇竊發衆號萬人焚掠山澤王贊單車按行境上率里

老講明鄉約具陳古今忠義之事詞旨慷慨聞者心動因使人持檄賊中諭以恩信爭縛首惡以獻事遂定蘭民素健訟王贊平心聽斷摘伏如神居三年當入覲有贖鍰四百金或請爲行賞王贊曰非吾志也卽召吏以葺陂塘之圯廢者扁舟就道惟衣囊書篋兩肩而已時詔入覲諸臣得直陳利害王贊上言南糧諸事俱報可命復任巡按王範行部訪逮姦蠹王贊獨無所舉屢檄不應範怒監司素不快王贊者構之範遂劾其偏執乖張調去士民巷哭罷市至擁塞城門不得行乃微服潛歸廷臣倪元璐范景文鄭三俊等交章薦之上一日御經筵顧輔臣曰人才難得盛王贊何如人對曰潔已

愛民上云何故被劾對曰不善事上官上曰此強項吏也越數日復問輔臣有一賢令未用乃手出一摺具載劾疏始末曰盛王贊也此人宜在銓部命未下而北都變作南都再造戎政尙書張國維首舉王贊時東陽新遭許都之亂都已禽而其黨懼罪猶負固劫掠國維東陽人故以爲請遂補東陽縣至則首驗獄囚凡事連許都者悉論遣之其黨遂解散甫七日以母喪去官邑民援軍中奪情例詣闕請留不得蘭谿人立祠祀之歲以生日爲盛公會吳人經其地者必問訊盛公安否南都破後削髮爲僧避居陽城湖濱課村童自給日無再食壬辰六月卒年六十有五

蕭雲程字漸于性質厚好詩崇禎十年巡按御史路振飛疏言  
 雲程孝友性成母鄒氏病篤割股進藥歿而廬墓繼母施氏  
 患痢額神請代卒獲痊族嫂孀貧割產贍給鄉人失金坐待  
 完歸養喪夫之姪女葬受業之亡師皆宜旌厲詔可明年禮  
 部侍郎顧錫疇復列其行命擢用不果

吳允夏字去盈秀曾孫博雅好古尤邃於理學事母謹治家嚴  
 肅如公府入太學累試不第杜門著述崇禎末歲饑允夏發  
 粟賑濟全活甚衆掩埋遺殮至五千有奇知縣葉翼雲重其  
 行遣使致羊酒謝不受

陳國珍字公獻母失明儻居城外鬻餅以養崇禎十三年家失  
 火母不得出國珍號泣躍入從煙燄中抱持以出皆頭額焦  
 灼不可識遂相繼死聞者傷之已上並松陵文獻

盧守善吳江人太醫院御醫割股療母祈益母壽十年肉為飛  
 動母果踰十年至崇禎十三年年九十八終舊府志

汝可起字君喜崇禎壬午以貢士廷試入都時疆圉多故帝臨  
 軒試選人騎射可起三發三中的上善之未及用吏部循資  
 授常州府訓導南歸至河間之故城縣縣已被兵可起止寓  
 舍遊騎突入戶見可起危坐不動曰汝官人耶當降我降即  
 不死可起叱之曰汝知有不畏死官人耶遂被刃罵不絕口  
 探血書壁未成字而死松陵文獻

吳易字日生邦楨孫生有膂力好兵法跣弛不羈崇禎十六年成進士福王時謁史可法於揚州可法異其才薦授職方主事監紀軍前甚著勞績明年奉檄督餉吳中未還而揚州失已而吳江亦失遂與同邑孫兆奎沈自炳自駟等號名舟師聚眾數千人屯長白蕩出沒旁近諸縣道路為梗唐王聞之授兵部右侍郎兼右僉都御史總督江南諸軍事楊文驄奏易斬獲多進為兵部尚書魯王亦授易兵部侍郎封長興伯忠烈紀實及松陵文獻諸書皆作東浙授易兵部尚書封長興伯闕亦授兵部侍郎兼副都御史忠義伯在丙戌春復起兵之後此八月二十四日出戰塘口獲舟二十明日大雨不設備為總兵吳勝兆所敗易子身走父承緒妻沈及女皆投

水死一軍盡殲明年春易鄉人周瑞復聚眾長白蕩迎易入

其營巡撫土國寶遣副將汪某討之八百人皆為所殺軍聲

頗振八月易至嘉善與倪曼青合營集飲孫璋家 大兵猝

至易被獲殺於杭州草橋門明史參忠烈紀實 松陵文獻

易死時年三十五無子妾阿香

孫兆奎字君昌祖履恒習兵家言兆奎能世其學崇禎丙子與

吳易同舉於鄉相得甚歡已遂同起兵長白蕩及兵敗父久

貞歿於軍兆奎先沈妻褚及女於湖而後自溺既溺氣未絕

為 大兵所執明史云兆奎兵敗時慮易妻女被辱視其死

而後行故被獲與忠烈紀實同今從吳江新志 至蘇州巡撫土國寶欲降之不屈械至江寧殺之臨刑賦

詩顏色不變兆奎從弟瓊字君瑜亦被執死湖州獄中同時死事者有中書舍人沈自炳諸生沈自駟華京趙汝珪朱旦

續名賢紀旦即鷺之孫也等自炳字君晦自駟字君牧俱副使琬子並能

文工詩福王時同參史可法幕自揚州歸與吳易同起兵及

敗二人俱赴水死京字壯輿吳縣諸生兵敗時先驅妻子入

水格殺數人他卒繼至手與搏戰相持溺死汝珪字子玉旦

字爾赤皆戰死

明史松陵文獻忠烈紀實吳江新志合纂

吳鑑字子儀易族子也為諸生有名乙酉六月七日大兵徇

吳江知縣林嶠走歸閩縣丞朱國佐以迎降改知縣黃蜚兵

至無錫鑑大喜徒手入縣庭罵國佐國佐執送蘇州知府不

能屈訊其黨與則曰孔子孟子張睢陽顏平原皆是也未幾

殺於胥門及易起兵擒國佐授其父汝延殺以祭鑑

忠烈紀實參縣

志時邑人先後死義者潘爾彪字京慧丙子舉人常在吳易

孫兆奎軍中後以病不能從及聞變憤懣以手拍案而絕吳

振遠字日干易舉兵時振遠亦部署里中子弟為一軍易敗

後軍亦散丙戌春易復起大兵從跡之事連振遠縛至蘇

州不屈死徐鑛字掌文與易同起兵易被執鑛走武康山中

死周耀始字思橋為諸生與易倡議城守易敗護老弱出城

未幾不食死沈璐字伯玉太常漢曾孫與耀始同守東城

大兵至死之又有呂雲孚沈約不能詳

吳江新志

陳宗道字夷甫吳江人授徒西洞庭山聞北京變入淮以策干  
當事不用遂歸漕撫路振飛流寓洞庭宗道讓之曰此非公  
等偷閒時也尋以不薙髮見殺同時以違制死者太學生丁

士俊字顓卿顧觀光字賓容醫者張起生

忠烈紀實參  
吳江新志

周邦彥字念祖瑞安令大章元孫邑諸生以世職千戶讓其弟

邦穆明亡誓以身殉丙戌冬賦絕命詞一夕走投吳淞江死

邦穆字子遠承世職以火失部劄降授試百戶六輓漕有廉

幹聲甲申後堅卧不起丙戌夏漕官馳檄强起之遂不食六

日先其兄邦彥死

吳江  
新志

王景亮字武侯初名佩字仙聲有至性刻苦嚮學崇禎末登進

士仕福王為中書舍人主雲南試道梗不能進遂至閩中唐

王擢為御史極言時事甚被恩禮旋加太僕卿巡按金衢兼

督學政丙戌八月衢州破自縊死

明史參松  
陵文獻

洪祖烈字定遠萬歷丙辰武進士累遷至南京水營游擊福王

立擢都督僉書祖烈能詩文氣岸雄偉有節操歷官三十年

囊橐蕭然乙酉六月武塘進士錢棟起兵推祖烈主其事兵

潰棟死祖烈走入閩丙戌秋與御史鄭為虹守仙霞嶺軍沒

死於浦城

蘇州先輩小傳  
參殉國彙編

張孝起字將子舉人基曾孫崇禎三年舉於鄉十六年授廉州

推官 大兵至孝起避海濱舉兵謀恢復戰敗被獲妻妾俱

投海死孝起羈軍中會李成棟叛歸永明王孝起亦脫去至肇慶王以為吏科給事中時朝政決於成棟子元允而袁彭年丁時魁金堡蒙正發劉湘客附之人目為五虎皆專橫無人臣禮孝起清真介直與大學士朱天麟等同心匡正不能勝庚寅王赴梧州時魁等失元允援以罪去王以孝起代時魁掌吏科印久之擢右僉都御史巡撫高雷廉瓊四府城破走避龍門島島破被執不食七日死

明史本傳參同時各傳

周永年字安期恭肅公用之後少負才名制義詩文倚待立就才器通敏風流弘長禪宮講席西園北里參承錯互詩酒淋漓莫不分身肆應獻酬曲中海內咸以通人目之晚而扼腕

時事講求掌故思以桑榆自奮遭亂坎坷卜居吳中西山未幾而歿所著詩累萬首信筆匠心不以推敲刻斲為能錢謙益雅重之嘗有詩云安期下筆無停手元歎拈毫正苦心人以為實錄元歎謂吳人徐波也

松陵文獻本列朝詩集又云永年於邑中文獻多所裒

輯知縣熊開元嘗以續志屬之業有成稿遭亂散佚深為可惜云

周燦字光甫家宰用元孫崇禎辛未進士歷知宣化會稽縣擢御史巡按江西福王立於南京宗室朱統鑣誣劾在籍詞臣楊廷麟召健兒謀不軌燦具疏白其誣後歸家堅臥不起與同邑諸高蹈者結驚隱詩社相倡和所著有澤畔吟

吳江新志

趙庚字渙之崇禎十六年進士知甌寧縣有惠政丙戌六月閩



中初舉鄉試庚為同考官遷行營禮部主事改文選司後為靈巖僧繼起嗣法弟子居天台國清寺辛卯冬來吳江至穆溪遇風舟覆而死為人恬淡貞粹確然不欺其志者也又有顧祖奎字元度天啓元年舉於鄉後知連城縣與庚同時為

戶部郎出知南寧府祝髮於肇慶之白雲寺而卒

松陵文獻蘇州先

輩小傳曰祖奎家絕音問者十餘年弟雪石走萬里往迎其兄骸骨挈其子與母歸故里人皆高其義雪石字文度

吳有涯字茂申幼穎異能文天啓七年舉於鄉數上不第與同郡張溥楊廷樞輩倡為復社四方人士翕然宗之邑中有大利病必慷慨白當事多所補救崇禎中署金壇教諭遷平陽知縣首立十禁又請折海運止預征政聲大著南都破入閩

中擢御史巡按浙東在閩三月前後四十七疏皆軍國急務以道梗駐處州浙東兵潰削髮為僧歸隱鄧尉山久之返故里當事請一見不可幽憂發病不言不出十餘年卒

松陵文獻

吳翮字扶九世居荻塘貌魁碩善談論少負才名喜結客復社初起翮與同郡張溥楊廷樞等實為領袖家饒於貲四方造訪者舟楫蔽荻塘而下客既登堂供具從者或在舟中作食煙火五六里相接如此十餘年無倦色溫體仁有子求入社翮不許幾罹重禍國變後絕意進取杜門著述為詩文多直抒胸臆不尚聲藻所藏明人文集至三千七百家手自編輯歲饑出粟煮糜活飢民數百里中德之乙未秋卒年四十六

所著有升恒堂集十卷弟翔翹俱有才名翔字振六有陸石  
子詩集四卷翹自有傳

松陵文獻參  
復社事實

史元字弱翁天才雋拔學有根柢與吳易趙渙齊名以古文詞  
相切劘有東湖倡和集三人者才氣相埒也後易死國難而  
元與渙俱落魄不偶元留心經濟嘗從水道至京師作河行  
注一卷鹽筴河漕之要略具焉數游公卿間以策干時無所  
遇困頓以死詩宗少陵老健無敵古體尤工渙字少文學行  
醇謹工五言先易卒

包捷字驚幾少有文名崇禎十五年舉於鄉亂後變姓名隱居  
陽山吳易死於杭親戚莫敢視捷潛往收其骸葬之壬辰歲

卒貧無以殮篋中惟淳化帖一部鬻以具棺云

以上俱松  
陵文獻

薛大訓字六詒本吳江人遷吳縣崇禎丙子中副榜以賢良方  
正授成都府通判有政績遷衡州府同知時衡為流賊所殘  
破守者皆遁去惟耒陽令辛嗣順保境以待大訓攝府篆兼  
轄五州縣事撫字防緝甚至流民多來歸妖尼天然自稱將  
軍聚眾劫掠大訓計擒戮之散其黨南都初建擢湖州知府  
未至聞已納款間道歸詢知父以不食斃獄中乃假為丐者  
負父屍殯於丙舍廬其側旦夕悲號已為道士服號紫光居  
士疾亟盡焚平日所著卒年四十六無子女夫龔模葬之吳

山祖墓之側

吳江  
新志

本朝

○金之俊字彥章吳江人後徙郡城明萬歷己未進士授中書舍人轉南禮部主事晉郎中出知順德府陞湖廣副使遷江西參政歷寧州口北固原順廣諸道皆有政績擢僉都御史巡撫京東督治昌平進兵部添註右侍郎李自成破京師之俊被執受刑賊敗歸

本朝仍授兵部右侍郎調吏部順治五年晉工部尚書改兵部十年改左都御史陞吏部尚書十一年晉國史院大學士乙未主會試十五年以更定官制為中和殿大學士歷加太傅復改內秘書院大學士康熙元年致仕卒年七十七諡文通之俊以才幹受知

世祖恩禮優渥故明時江浙白糧民運每至破家之俊疏陳其

弊遂改官運有息齋集行世舊府縣志合纂

○鈕應斗字宿夫東吉港人明崇禎十六年進士授漳浦知縣初至延見紳耆問民疾苦以興革為務前令余瞿父所行善政一遵其法漳浦地濱海沃饒宦其地者號為金浦應斗一無所染百姓驩愛唐王立於閩鄭芝龍縱其卒虐民有司不敢問應斗輒繫治之而移文報芝龍芝龍怒欲中傷之黃道周何楷力為之解乃貽書謝過戒飭其下其後卒過漳浦無敢擾者會

王師平閩遂歸時年未三十里居教授垂五十年年七十四卒

吳江新志

○陳紹文字西美明御史王道曾孫九齡失怙執喪如成人博涉書史年二十中崇禎十二年鄉試明亡遂絕意進取閉門課子遂於濂洛之學所輯有宋元明儒心學指要年六十餘卒二子銳鏐銳字穎長鏐字霜赤未弱冠相繼為名諸生

國初制義承明季之陋詭怪不經銳鏐力宗先正選刻程墨皆醇百篇行世文體由此稍變既久困場屋遂肆力詩古文詞銳登康熙戊辰進士鏐以貢入太學皆未仕卒兩人內行並修取予不苟鏐子沂震字起雷博學工詩由進士歷官刑科

給事中提督山東學政

吳江新志

○吳之紀字小修祖瑞徵明萬歷庚戌進士官至河南副使以廉能稱之紀生有夙慧年十二就童子試知縣熊開元大為稱賞順治己丑成進士授工部主事遷湖廣按察司僉事修築堤防置豐樂湖渡船楚人頌之投劾歸室中蕭然書法米芾詩秀婉古文擬歐陽所著有適吟詩草好我齋集

○沈自南字留侯副使琬少子順治壬辰進士授蓬萊知縣清介自矢失大吏意被劾去尋卒自南與諸兄皆以文學有盛名鄉里以為美談所著有藝林彙考二百餘卷歷代紀事考異樂府箋題等書

以上俱葉志

○吳翹字羽三少能文與兄翹翹齊名既長有智略喜談兵舉順治乙未進士知澄邁縣時瓊州甫定民疲盜熾外寇交訌翹招撫流亡訓練鄉勇擒斬叛黎招降海賊在兵間五年屢有功為總兵官高進庫所抑不得上丁母艱歸後歷知豐城漢川二縣翹長於詩涖官所至與士大夫相倡和所著有松巖集子祖修字慎思豪邁有父風亦長於詩久困場屋以諸生終

震澤縣志

○張拱乾字九臨吳江人少沈潛好學為諸生有名游金壇周鏹之門南都建阮大鍼報夙怨尤恨鏹嗾人疏劾復社黨魁鏹遇害拱乾與沈壽民張名烈等皆逮問會大兵南下事

得解薙髮令下拱乾與其父君美不奉制為鎮將吳某所捕時同繫者四十餘人以次受戮次及拱乾父子吳帥忽沈思曰吾稔知此人三吳才士也杖而釋之拱臨乃剪髮為黃冠杜門不出溧陽陳名夏在政府雅知拱乾言於朝以中書舍人名不就作荀彧田疇論以見志部使者聞其名請見皆不報晚歲屏絕交游坐卧一小樓顏曰獨倚親戚見其匱乏饋之米則受進以金帛不顧也為文初學昌黎晚喜止齋同甫之文曰吾才小苦拘檢非此不足以拓心胸也年七十四卒無子鄉人私謚貞毅先生

吳江新志

○徐白字介白本嘉興人徙吳江性狷介不苟取予以諸生久

次當貢遭亂棄去隱靈巖之上沙有園數畝無子女不蓄僮僕手一鎌種蔬藝果拮拾自給暇則坐小樓作畫吟詩詩幽秀得晚唐風致畫蕭疎無俗韻故舊相尋掃落葉汲泉烹之清談終日使人忘世三十餘年不出山所善趙瀚字砥之士諤孫亦需次當貢棄而耕於野盡亡其世業家無儲粟晏如也為人清恬和粹不以氣節自高人尤重之與白先後死松陵文獻續纂同時鄒甲芳字子先亦諸生與瀚偕隱西郊或傳學使者至不出且遣戍瀚以語甲芳甲芳正色曰吾輩但當論是非不當計利害遂止瀚每為人言微鄒君幾喪吾守時稱西

郊兩高士 吳江新志

○戴笠字耘野初名鼎立字則之孤貧力學為諸生文行炳著乙酉後入秀峯山為僧久乃返初服教授自資勤於著述謂明亡於流寇綜其始末作寇事編年采輯明末死義諸臣事蹟作殉國彙編別紀烈女為骨香集後死者為耆舊集為發潛錄又有聖安書法文思紀略魯春秋行在陽秋等書共數十卷居同里之朱家港土屋二間旁穿上漏炊煙時絕略不關懷惟孜孜編纂老而不倦海內著述家服其精博惜多散佚不傳時同里又有章夢易字兩生幼工舉子業中年棄去潛心經術著易筌詩源左氏兵法楚辭補注顧偉字英白深明象數晚通歷術所著名格軒遺書凡四十五種 松陵文獻續纂

○翁遜字仲謙居城西門外性高潔不喜見流俗人爲詩淡遠多苦思亂後西郊多吟社遜所與倡酬者自徐白戴笠顧有孝外未嘗妄有所詣常獨行野外遇深林曲徑則徘徊吟賞至於衢市所在必紆道避之晨炊不繼泊如也鄰有好事者或斂粟周之義不受卒窮餓以死

松陵文獻

○吳宗潛字東籬崑崙山人王叔承其外祖也兄弟七人並有雋才而宗潛尤雄肆爲諸生試輒冠其曹雅負經世之學申酉間奮身許國與弟宗漢宗泌往來兵間數蹈危難兄振遠死兵皆散乃歸隱嚴墓村與吳興沈祖孝范風仁嘉禾金甌朱臨同邑葉繼武吳珂等結驚隱詩社士之高蹈能文者胥

集焉後隱於醫著名茗雪間年七十八病亟口占古詩數百言而卒宗漢字南村宗泌字西山並博學工文辭宗漢真純有至性外和而內介遭伯兄難棄家遠引久之歸雅好濂洛之學充養純粹詩篇氣體高邁卒年四十一門人私謚貞孝先生宗泌強毅能苦辛以身殉義奮不顧家爲詩思致深沈音節道美得中唐風格葉繼武字桓奏爲人篤於氣誼居唐湖濱有煙水竹木之勝好友過從文酒流連旬日不倦詩警切無浮聲吳珂字匡廬耿介有節概詩思刻深結撰務出人意表人服其奇雋

松陵文獻續纂

○潘樞章字聖木一字力田參政志伊曾孫父凱字仲和邑諸

生高才積學德清章日烱其婦翁也來知吳江縣凱深自晦  
匿惟陰言民間利病雪人冤抑一無所私檉章生有異稟穎  
悟絕人年十五補桐鄉弟子員亂後棄去隱居韭溪肆力於  
學綜貫百家已乃專精史事欲做馬遷書作明史記友人吳  
炎所見略同遂與同事檉章分撰本紀及諸志炎分撰世家  
列傳檉章長於考核炎長於敘事互相討論間出其藁質之  
錢謙益謙益大善之歎曰老夫耄矣不圖今日復見二君撰  
述數年其書已成十之六七會南潯莊氏史獄起參閱有檉  
章及炎名俱及於難莊氏書以故閣臣朱國禎史概爲粉本  
自與茗士共足成之二人未嘗寓目徒以名重爲所摭引旣

罹慘禍其書所就者亦不傳今所存者今樂府國史考異松

陵文獻杜詩博議王林韭溪集凡若干卷

戴笠  
撰傳

○吳炎字赤溟宗漢子年亞諸父而才與之埒亂後棄諸生隱  
居教授初以詩文自豪所擬古賦及今樂府皆傳誦於時旣  
而與所善潘檉章共撰明史炎天才矯拔文筆勁健所撰世  
家列傳甚有體裁詳而核簡而明美惡不掩有古良史風書  
未及成遭烏程史案株連遂及於難同邑諸生張雋字文通  
操行方嚴繩趨矩步學者宗之著述甚富綜括帝堯以來至  
明代事蹟爲三部略數百卷居湖濱之吳淞去南潯最近莊  
氏刻史羅列諸名士於簡端不闕知與不知雋亦廁名其間




遂坐死年六十餘矣雋之表弟董二酉字誦孫亦居吳淞從雋講濂洛之學踐履真純天懷粹白莊史難作二酉前卒竟

坐其家 松陵文獻續纂  
參吳江新志

○王錫闡字寅旭葵南先生雲之曾孫生而穎異多深湛之思詩文峭勁有奇氣博極羣書尤精歷象之學明代用大統歷惟疇人子弟習之儒生已罕有知者至西歷尤深奧非專門授受莫能通錫闡聰悟絕倫覽西人書輒能明其法數并所以立法之故久而洞徹源底謂中歷西歷互有短長乃自創新法用以候日月食頗密於前人所著歷法歷說大統歷啓蒙解圖三辰儀晷諸書通歷術者視之以為專家不逮也為

人孤介寡合古衣冠獨行踽踽不用時世一錢年五十五卒無子

○朱鶴齡字長孺弱冠補諸生甲申後閉戶著書長於箋疏之學注杜工部李義山集行於世晚年尤究心經學以朱子摛擊詩序太過集諸家說疏通序義為毛詩古義二十卷以蔡氏釋書未精撰尚書坤傳十七卷以胡氏傳春秋多偏見鑿說乃合唐宋以來諸儒之解撰春秋集說二十二卷又以杜氏注左傳未盡合俗儒又以林氏亂之撰讀左日鈔十四卷易理至宋儒始明然左傳國語所載占法皆言象也本義精美而多未備成易廣義略四卷生平殫精書史遺落世事晨



夕一編行不識路途坐不知寒暑人或謂之愚因自號愚庵  
所著有愚庵小集年七十餘卒

葉志參松陵  
文獻續纂

○顧有孝字茂倫為人開美長身玉立善談論喜交游家釣雪  
灘陋巷蓬門四方賓至無虛日有孝傾身攬接明末吳中詩  
習多漸染鍾譚有孝與徐白潘陸俞南史周安顧樵輩揚摧  
風雅一以唐音為宗所選唐詩英華盛行於世後來詩體為  
之一變繼又有五朝詩鈔明文英華諸選雅好汲引人有寸  
長必咨嗟激賞寒素多依以揚聲故雖布衣窮居而名聞海  
內周安字安節樂道甘貧詩格清遠不事雕飾而天趣爛然  
顧樵字樵水志尚冲素詩雋永有錢劉風味畫入能品

○朱明德字不遠少治經義有聲從學者戶屢常滿隱居爛溪  
之濱作廣宋遺民錄以見志諸隱者多輕世肆志或以語言  
文字賈禍明德內介而外和不為矯激崖異之行故患難不  
及潛心學道教授有方弟子著籍者凡數百人晚年有得於  
性命之旨養充神王至老不衰同隱溪濱者計大章字采臣  
亦闡修之士

以上俱松陵  
文獻續纂

○王載字咸平博學通經為諸生領袖亂後歸隱湖浦灌園蔬  
以養母時與羣弟子講明理學所造就皆成端士論者稱其  
學不為人隱不近名蓋味道而有得者也時里中同隱者李  
培字上材究心良知之學常杜門謝客戚勳字元公居平望

後溪教授弟子以吟詠自娛有町廬集

震澤新志

○張嘉玲字佩慈少有才藻與兄進士嘉璫埒應舉甚銳既而與桐鄉張履祥遊聞作聖之學遂謝諸生欣然嚮往執父喪力行古禮三日不食小祥內疏食水飲菜果不入口三年中衰麻不去身未嘗沐浴入內室嘉璫既歿并其先八棺一力營葬其講學排陸王而宗程朱方欲有所論著病作遂卒年僅三十四履祥痛惜謂嘉玲析理精徙義勇日進而未見其止天天其年斯道之不幸也弟嘉瑾字宣城為人伉爽有至性居親喪執禮與嘉玲同而事兄友愛尤至嘉玲歿後三年亦病卒時與嘉玲同游履祥之門者姚瑚及其弟璉八都人

瑚字攻玉敦尚行義著困學編璉字肆夏學問淵博善說經

有小學及近思錄注

松陵文獻續纂參震澤新志

○陳啓源字長發邑諸生性嚴峻不樂與外人接惟嗜讀書工於詩晚歲研精經學著毛詩稽古編三十卷大指以小序為宗其訓釋句字則采擇漢唐宋諸儒之說至於數典辨物咸極精博又有尚書辨略二卷讀書偶筆二卷存耕堂彙四卷

吳江新志

○浦龍淵字潛夫吳江人精易學順治中大學士洪承疇經略西南五省辟置幕中奏授城步知縣後罷歸所著周易通十卷周易辨二十八卷採衆說而會通之論者謂其可以翼往

聖而開來學

經義考參  
精華錄注

○趙灃字山子明甌寧令庾子順治八年舉人善屬文尤工古

今體詩出入隨州香山之間初在慎交社與同邑吳兆騫計

東並為崑山徐乾學所推重既而與顧有孝鈔選詩文名播

海內屢上公車不第就江陰教諭卒

震澤  
新志

○計東字甫草吳江人父名字青麟故名士東自幼好跳盪父

友吳翽獨器之妻以女年十五補諸生文譽日起遭亂家居

取經史諸書盡讀之講求義理指歸治亂得失之要旁及權

衡兵法陰陽占候之術嘗著籌南五論上閣部史可法可法

奇之順治丁酉舉順天鄉試

御試第二名動長安三試禮部不第旋遭奏銷案被黜既放廢

不得志出游四方嘗自京師北走宣雲南歷洛漳邢魏東之

濟兗所至結交賢士大夫詩文縱橫跌宕務極其才力而後

已對客議論風發一座盡傾時或憤激怒罵人皆以狂目之

卒年五十二所著有改亭集

九例計  
孝廉傳

○吳兆騫字漢槎永州推官晉錫子少有雋才童子時作膽賦

累千餘言見者驚異與兄兆寬兆宮同與慎交社名聞遠近

為人簡傲不拘細行順治丁酉舉於鄉科場事發遣戍寧古

塔在塞外二十餘年日與羈臣逐客飲酒賦詩氣壯而才麗

諸大帥皆敬禮之康熙癸亥獻所作長白山賦

聖祖覽而稱善友人大學士宋德宜捐金贖之得釋歸逾年卒  
所著有秋笳集兆寬字弘人兆宮字聞夏並工文兆騫被放

二人家亦破遂絕意進取專精於詩

錢霑續志吳江新志合纂

○潘見龍字雲從雙楊人聰慧好讀書有膂力能辛苦躬耕  
養親順治十五年中會試念其親遂歸十八年廷試釋褐復  
不俟館選而歸居父喪執禮甚至母疾篤刲股療之康熙十  
年選授葉縣知縣招流民墾荒土命工製耒耜桔槔諸農具  
教以南方種稻之法不三年而秔稻遍野斗米直二三十錢  
十三年西南變起葉當要道滿漢兵至見龍盛供具請主帥  
下令毋擾百姓以故大軍更番往來民不知兵母艱歸服闋

補閩中縣時四川新復譚彭逆黨猶時時竊發城中居民僅  
數十家見龍一意撫綏流民漸復居三年擢寧海知州入為  
刑部員外郎進郎中遷曲靖知府會巡撫奏留前官候補未

得而歸尋卒

吳江新志

○葉燮字星期紹袁子康熙庚戌進士授寶應知縣以伉直忤  
巡撫慕天顏被劾歸燮天才卓犖長詩古文辭千言立就其  
論文以不蹈襲前人能自立言為主論詩以杜韓蘇三家為  
宗既放廢徧游名山胸有感觸一發於詩晚居吳之橫山構  
小園顏曰獨立蒼茫處著述其中巡撫宋犖重其名嘗減從  
來訪辭不見犖曰獨立蒼茫處容一到否延竚久之乃去燮

亦不往報也所著有已畦文集二十卷詩集十卷原詩四卷  
殘餘一卷及吳江寶應陳留儀封等縣志並行世

吳江新志  
參吳縣新

志

○潘耒字次耕檉章弟幼穎異讀書日百行初從兄學又師事  
徐枋顧炎武淹貫羣書工詩古文辭兼長史學康熙十七年  
以博學宏詞徵試授檢討纂修明史耒以史事重大條上四  
議總裁然其說令專換食貨志兼訂定他紀傳充

日講起居注官纂修

實錄

聖訓壬戌為會試同考官得士十二人皆天下選後二年甄別

議起忌者坐以浮躁降調遂歸四十二年

上南巡復耒原官大學士陳廷敬欲薦起之力辭而止耒有至  
性事母孝居喪哀毀骨立於師門之誼尤篤徐枋隱居數十  
年家計蕭然臨歿以孤孫相託耒為謀置生產又捍衛其外  
侮顧炎武所著日知錄多經世大業耒在閩中有贈買山資  
者舉以刻之始得傳於世生平好著述與遠遊凡黃廬天台  
雁蕩武夷羅浮諸名山盡窮其勝記以詩文其學旁及歷法  
筭數宗乘道藏於聲韻反切能通其微所著類音八卷遂初  
堂詩文集四十卷並行於世卒年六十三

錢坫續志吳  
江新志合纂

○徐鉉字電發幼穎敏年十三賦詩有驚人句長益工詩古文

辭又善畫山水入慎交社聲譽日起康熙己未以博學宏詞  
 徵試與邑人潘耒同授檢討纂修明史會有翰林外轉事鈞  
 以忤權貴意亦在遣中遂拂衣歸性好遠游東入浙閩歷江  
 右三至兩粵一至中州所至與名流勝侶探奇題詠時  
 上數南巡兩賜御書

詔以原官起用竟不就年七十三卒鈞少時所刻菊莊詞朝鮮  
 貢使仇元吉見之以金餅購去貽詩曰中朝攜得菊莊詞讀  
 罷煙霞照海濬北宋風流何處是一聲鐵笛起相思其為遠  
 人所慕如此所著有南州草堂集三十卷詞苑叢談十二卷  
 本事詩十二卷錢霑  
續志

○鈕琇字書城康熙中由拔貢歷知項城白水縣兼攝沈邱蒲  
 城篆後終高明縣為人有才略遇事能斷項城多曠土賦不  
 入民逃亡琇悉捐舊逋予牛種以招徠之皆復業沈邱獄有  
 淹繫家口歷十七年琇至三日盡出之蒲城歲方禱盜白晝  
 行劫琇率吏卒入盜穴捕其魁沈諸河其餘黨之蔓延者村  
 民縛以來盡杖殺之盜乃息高明縣界連大頂皂幕諸山多  
 積盜琇推誠招撫盜出就撫者二十四人請於制府悉免死  
 築室授食以安之責以巡警捍禦邑境永寧卒於官高明人  
 祠之名宦祠琇博雅工文所著有臨野堂集及觚賸行於世

震澤  
新志

○張尙瑗字弘蘧康熙戊辰進士選庶吉士改興國知縣尙瑗初好庾子山集熟文選工駢體文中歲頗自悔專為古文辭晚年究心春秋三傳及國語國策於註解多所補正生平以書卷為行厨出入必載與俱以多聞強識聞於世事多遺忽其罷官而客江右也當事聘主豫章書院尙瑗創立規條以古學相鏃礪所獎拔皆成名

震澤新志

○吳樹臣字大馮兆寬子康熙中以拔貢入國子監教習正白旗選知廣東四會縣撫輯有方擢漢州知州以事忤上官罷歸尋復官改知潼川州久之遷順天治中轉刑部員外郎進郎中京師巨猾王五為偷盜長淫克陰賊常殺人而擁厚貲

交通諸貴人諸貴人爭庇之前後訟之者甚眾有司莫能治樹臣視事即捕訊盡得其罪狀擬以大辟滿尙書別為奏出其罪漢尙書及郎中以下並署名強樹臣樹臣不可奏既上聖祖素知王五事大怒立誅殺王五禱漢尙書王士禎職滿尙書及滿司官並鞭責流徙烏喇時四十三年秋也樹臣在刑部三年平反冤獄甚眾以勞瘁卒於官

吳江新志

○陳萇字玉文康熙三十六年進士知桐廬縣在任六年政聲遠聞外艱歸年五十卒萇少工制義既而從吳祖修學詩得其指授與同邑周振業龍藻陳沂震許運昌皆以詩名桐廬富山水佳處政暇輒登臨嘯詠其詩益清真淡遠論者謂得



江山之助所著有雪川集

震澤新志

○費洪學字巽來康熙庚辰進士授博野知縣北俗健鬪輕死

好賭博多土娼夫婦常相棄而豪猾猶為患洪學初至首按

不法武舉魏某正其罪其餘一切以大義開諭之犯者法必

行俗遂變秋糧加耗民戶獨畸重洪學裁之使紳民畫一社

倉穀之貸於民者歲入息有常例洪學量減其息之半歷三

載卒於官

吳江新志

○周振業字右序明御史宗建曾孫以歲貢中雍正癸卯副榜

少受業於桐鄉進士朱彝遂於理學為文能抉先儒之闕奧

從游者數十百人敦於行誼所得修脯悉以散宗黨之貧者

嘗遇故人子於途哀其衣單即解衣予之忍凍而歸因感疾

卒年七十一所著有意庭集從弟龍藻字漢荀性嗜學博覽

羣書尤精詩律初出入白蘇繼而原本風騷根柢杜韓有所

感觸皆寫於詩兼長史學多識前朝典故久困諸生以歲貢

終所著有恒齋詩集四十卷文集十卷

○皇甫沆字紫洄吳江六都人為烏程諸生父珏客夔州府幕

有疾沆往省鉅已歿柩厝叢祠中方謀歸殯而吳三桂叛沆

為賊所獲脅令從逆殺其僕瀝血沆首沆不為屈賊帥義而

釋之已為浮屠服竄山谷中昏夜輒走伏父棺前慟哭在夔

十一年滇蜀平乃得扶柩歸舟行川峽間屢瀕於危卒得脫

既歸里僅有屋數椽鬻以供葬事廬墓三載乾隆九年旌又  
邑人趙文炯字電雙亦以孝友稱於鄉

震澤新志

○陸維賢吳江八坼人幼喪母及長每念母輒流涕遇忌日必  
悲號竟日事父盡孝家酷貧為里牙所得錢必以具甘脆年  
逾壯不娶曰吾力任養父而已不能及妻子也父患中風十  
餘年時其飢渴寒暖及洗沐涕唾溲溺之節恒先意為之備  
與父同臥一榻當暑夕不敢揮扇冬則溫父足於懷父喜觀  
劇每春日輒負父走鄰村盡其歡而後返父歿哭之嘔血三  
年無笑容後念嗣續大義娶妻得一子終以哭父成疾逾年  
卒又同邑沈自顯曹天祿徐杲張惟馨嚴代言皇甫銍俱雍

正乾隆間以孝行旌

吳江新志

蘇州府志卷第六十五

蘇州府志卷第六十六

藝術

舊志曰吳人多巧書畫琴棋之類曰藝醫卜星相之類曰  
 術梓匠輪輿之類曰技之數者本非一道然以藝術技三  
 者分之又未當也今重加釐訂曰書畫曰醫曰琴棋曰術  
 曰數曰技巧區其類而仍合為一編至如張旭之書黃公望  
 沈周之畫葛乾孫王履之醫非不入神詣微而其人要不  
 得以藝術概之也故自見於人物焉

三國吳

張弘字敬禮吳郡人篤學不仕恒着烏巾時號張烏巾善篆隸

其飛白妙絕當時有飛仙舞鶴之態自作飛白序勢備述其

美張懷瓘書斷

晉

張嘉字子勝吳郡人官至光祿大夫善隸書羊欣云嘉師於鍾

氏勝王羲之在臨川也書斷子澄字國明光祿大夫正書有鍾

氏餘風寶蒙述書賦注澄子彭祖官至龍驤將軍善隸書右軍每見

其緘牘輒存而玩之書斷

沈嘉字長茂吳郡人吳興太守述書賦注述書賦曰長茂草書既健

而踈慕王不及獨斷所如猶鷺鳥擊搏而失中因蹭蹬於邱

墟

南北朝宋

陸探微吳人善畫得六法之妙平生愛寫古聖賢象明帝時常

在侍從二子綏弘肅得家學張彥遠論其體運道舉風力頓

挫一點一拂動筆不凡姑蘇志

顧寶光南史作寶先郡人琛之子善畫全法陸探微大明中為尚書

水部郎官至司徒右曹掾尤善行書卓越多奇王僧虔嘗作

飛白書以示之寶光曰下官今為飛白屈矣姑蘇志

梁

范懷約吳人能隸書南史顧協傳述書賦注懷約梁東宮侍

功

張僧繇吳人丹青絕代嘗畫江陵天皇寺柏堂作盧舍那像及仲尼十哲明帝怪問釋寺何為畫孔聖僧繇曰後當賴此及廢浮屠法獨此殿有聖人像得不毀又金陵安樂寺畫四龍不點睛云點之即飛去人以為誕固請點之須臾雷電破壁二龍乘雲騰上天未點者見存又畫天竺胡僧侯景亂析而為二一為唐右常侍陸堅所寶堅疾篤夢胡僧云我有同侶離析多年今在洛陽李氏若求合之當以法力助君陸以錢帛求於其處果得之劉長卿為之記甚詳潤州興國寺苦鳩鴿棲梁上穢污尊像僧繇於東壁畫一鷹西壁畫一鷄皆側首向簷外鳩鴿不敢入畫筆通神如此者不可具載

朝野僉載歷

代名畫記云僧繇天監中為武陵王國侍郎直秘閣知畫事歷右軍將軍吳興太守子善果儒童並師於父

唐

陸柬之吳郡人宰相元方之伯父虞永興之甥也臨學舅氏得

其法遂以書專家與歐褚齊名張懷瓘謂其隸行入妙草入

能官至太子司議郎

朱長文墨池編

柬之子彥遠

唐書宰相世系表官贊善大夫時

謂小陸傳父書法以傳其甥張旭

陶宗儀書史會要

史惟則字天問吳人工八分飛白二篆在唐中葉以八分名家

者四人惟則與韓擇木蔡有鄰李潮也歷集賢翰林學士

吳郡

圖經續記趙明誠金石錄云又有史懷則與惟則同時必其舅弟也八分不減惟則

張從申吳郡人進士擢第官至大理司直工正行書結字緊密

當大歷後徐季海已老獨從申高步江淮間凡其書碑李陽  
冰多為題額故得名益高兄從師從義從約並工書皆得右

軍風規時人謂之張氏四龍

述書賦注墨池編東觀餘論合纂按寶泉述書賦云張氏四

龍名揚海內厥有季弟功夫少對從師從義從約並從申兄也述書賦注東觀餘論作弟誤又吳郡志人物內載張從師引張說所撰墓誌云河南府法曹參軍有唐逸士吳郡張從師師冲和純粹辨博閱達卓犖好古儻蕩逸羣秀才高第歷官五政忘懷樂道如浮雲無心野鶴獨立上元二年終葬虎邱西原子惟儉惟靜弱歲皆精左氏穀梁春秋弟從申時為秘書省正字從師祖損之隋侍御史水部郎損之生法碩學麗藻名動京師從師之父也從申自有時名書法甚高按吳郡志所引墓誌云云乃獨孤及所撰今見集中是墓表非誌也自吳郡志誤作張說時代不同遂啟後人之疑今既考正附見於此

張璪字文通吳郡人相國王縉奏檢校祠部員外郎鹽鐵判官

坐事貶衡州司馬移忠州尤工樹石山水自撰繪境一篇言

畫之要訣初畢宏擅名於代一見驚嘆之異其唯用秃毫或

以手摸絹素因問璪所受璪曰外師造化中得心源宏於是

閣筆

歷代名畫記

嘗畫松以手握雙管一時齊下一為生枝一為

枯枝生枝則潤含春暉枯枝則慘同秋色可居神品

唐朝名畫錄

顧生吳人大歷中以畫山水歷抵諸侯之門每畫先貼絹數十

幅於地多研墨汁及諸采色各貯一器使人吹角擊鼓數十

人齊聲大噪顧生著錦襖飲酒半酣遶絹十餘匝取墨汁瀉

絹上次傾諸色乃以長巾一頭覆於所瀉之處使人坐壓已

執巾角而曳之迴環既遍然後以墨筆隨勢開決為峯巒島

嶼之狀妙不可言

封氏見聞錄

滕昌祐字勝華先本吳人隨僖宗入蜀以文學從事不婚不仕

情性高潔工畫無師惟寫生物以似為功有蟲魚圖蟬蝶圖

生菜圖折枝花圖折枝果子圖雜竹樣造夾紵果子隨類傳

色並擬諸生葢邊鸞之類也

益州名畫錄

宋

丁德隅晉公謂之孫工篆書

姑蘇志

張經

一作涇

姑蘇人善雜畫尤精傳模

圖畫見聞志

何克郡人能寫貌擅藝東南

姑蘇志

朱象先字景初松陵人善畫馳名紹聖元符間蘇軾跋其畫云

景初能文而不求舉善畫而不求售嘗自言曰文以達吾心

畫以適吾意而已故其所作得之自然世亦罕見不知其所

長也

畫繼

毛松崑山人善畫花鳥四時之景子益乾道間畫院待詔益子

允升景定中畫院待詔皆工花鳥能世家學

姑蘇志

馮大有宋承事郎居吳門七歲能文善畫蓮為陰晴風雨四種

間情寄寫精巧入神放情山水時稱高士

牛若麟吳縣志

李懷仁姑蘇道士酒豪不羈嘗呼龍松江之上狎而觀之遂畫

龍入神品過天慶觀大醉素墨漿數斗曳苔帚裂中袂濡墨

號呼奮擲斯須龍成觀者失聲辟易懼將攫也懷仁後不知

所終費袞梁溪漫志

元

李世英字伯英長洲人精書學作韻類三十卷其義以字為本音為幹義訓為枝葉自一而二井井不紊凡十年而成書從子文仲又本說文作字鑑五篇辨點畫刊除舛謬以脩一家之言于文傳黃潛為之序姑蘇志

張淵字清夫吳江人博學好古有詩名尤工書法皇慶中以薦為東省提舉松陵文獻

吳睿字思孟自杭來居崑山工翰墨尤精篆隸師吾衍得其書法四方求書者甚眾舊府志

朱珪字伯盛崑山人師吳睿大小篆尤善摹刻嘗取王厚之趙孟頫吾衍三家印章譜說并睿與已所製印文篆例為書曰印文集考又有名蹟錄即珪素所刻名文也性孤潔讀書十年不下樓五十不娶楊維禎為撰方寸鐵志姑蘇志參縣志

朱玉字君璧崑山人善繪事聞佳山水每翛然獨往永嘉王振鵬在仁宗朝以界畫稱旨玉從之游盡得其技嘗奉命圖藏經佛像方不盈矩曲盡其妙而意度橫生不束於繩墨人言振鵬蓋不之過云朱珪名蹟錄

張遜字仲敏畫史會要云號溪雲吳人畫竹作鈎勒法妙絕當世山水學巨然則不逮竹吳中人物志



陸廣字季弘號天游生吳人畫做王叔明落筆蒼古用墨不凡其寫樹枝有鸞舞蛇驚之勢

畫史會要

李立吳人其畫法多做小李將軍嘗為顧阿瑛作玉山雅集圖

吳中人物志

謝伯誠任陽人畫法超逸得董北苑之傳嘗作瀑布圖楊廉夫

品題之又有謝庭芝字仲和亦家任陽善畫山水竹石詩亦

工龔立本常熟志

明

趙原字善長吳人號章淋畫師董源甚得其骨格明初名天下

畫士至京圖歷代功臣輿大應對不稱旨坐死

姑蘇志

顧因嘗為元官明初遁跡善繪事每見奇山水及樹石佳者瞻

目疑視覺與興會輒恣揮灑時叫絕謂得意初師董源出入

諸家尤工設色亦自稱大癡

龔立本常熟志

袁養福字能伯吳郡人

祖易見長洲人物

負才氣有詩名精於書法吳原博曰能伯書郭有道碑端勁清峭深得率更筆法而吳人

固不知有袁養福也

列朝詩集

王時字景南崑山人博學好古精於篆隸章草用意深密凡六

書源委靡不擇究深為盧熊所稱美

方鵬崑山志

馬孜字彥強吳江人善書洪武中嘗受薦不仕

吳中人物志

陳圭字伯珪元大孫務學不仕師米氏父子作山水筆意高雅

頗自愛不輕為人作子允文居鄉有隱德能詩亦善寫生鄧

常熟志

沈宗學字起宗隱於煉墨自號墨翁博學善書能作徑尺大字

詹孟舉評其書兼歐虞顏柳有冠帶佩玉氣象尤精醫與王

賓友善所著有本草發揮精華十二經絡治療滌源外科新

錄墨法集要增補廣韻七音字母子貴成字志道隱於櫛髮

亦博學能書抱奇崛之行後人購得其父子遺蹟衰潢寶藏

之吳縣志

朱祺字孟祺行已方雅畫山水能兼諸家所長名籍甚號拙菴

居士子佐字廷輔侃字廷直並精於人物佐入京隸畫院侃

山水師夏珪尤超逸早亡佐之子蒙亦以畫名鄧

鄧

屈昶字處誠崑山人善畫竹繼夏太常之後間作枯木竹石簡

淡古遠得王孟端筆意縣志

范暹字啟東崑山人善畫花鳥永樂中入畫院博識有談論館

閣名公多重之人稱葦齋先生葉盛水

東日記

沈遇字公濟吳縣人號臞樵其先有肖鑑者宋咸淳中寫照有

名遇善山水淺絳丹青種種能之晚工雪景永樂末嘗召見

歸以高年終姑蘇志

陳儀字羽伯常熟人通篆隸能鑒古器物弟仔字時佐有四裔

考異蛩吟續響集子佑字惟孝篆刻尤精亦善鑒古有小篆

千文縣志

謝晉字孔昭吳縣人號葵邱工畫山水重疊爛熳尋丈之間不日而就嘗自戲為謝疊山吳原博詩云風流前輩杳難攀謔語空傳謝疊山為此性耿介里人疾之以繪工起貢京師僑居金陵廿餘年以目眚放歸亦能詩有蘭亭集列朝詩集

馬紹榮字宗勉常熟人初為周氏養子冒其姓有巧思善楷書天順壬午舉順天鄉試成化初授中書舍人直文淵閣陞驗封員外郎陳情復姓弘治初脩憲宗實錄遷山東參議陞太常少卿居官三十年以清謹稱其居內閣最久與永嘉姜立綱齊名姜書法子昂紹榮宗宋克其陞少卿也立綱以出身

布衣不得齊官紹榮請捐一階與立綱齊故紹榮得太常立

綱得太僕朝論賢之管志

蘇復字性初長洲人以貢為綿州知州作畫師盛懋後宦游歸盡變舊習然不苟作終歲不能脫一幅孔昭之速性初之遲

各擅其所長姑蘇志

周號字德元崑山人有司兩以賢良薦不就工於篆隸凡碑碣

題署多出其手舊府志

支鑑字汝同整潔自喜都不與世作緣每旦起拂拭几案手界烏絲欄作百十楷字蠅頭蟬翼具有尋丈之勢或請書宮廟墟墓碑版莊體勻畫無異小楷人以為得書中三昧云嘗戲

作叢篠澗蒲蒼翠如滴一時寫生家爭傳寶之物

崑山人物傳

陳暹字季昭吳縣人善設色山水人物以畫名者六十年不喜

親世務所交惟杜瓊一人

王志堅人物傳

瞿杲字炳暘五衢人性坦率嗜酒落魄自號醉漁畫花鳥有名

蘆鴈入高品亦能詩後隱於澄江之龜山杲以藝傳里人錢

祖蕭完性趣亦類杲蘆鴈亦佳完次之

鄧韞常熟志

王綸字理之以字行少師事沈啟南稱入室尤工篆隸楷書不

減率更令嘗與修武廟實錄及崑山志所著崑山續詠節烈

編藏於家

崑山人物傳

許初字復初吳縣人以貢授教職書法二王尤工篆籀擢南京

太僕寺主簿遷漢陽府通判

吳縣志

周臣字舜卿號東村學畫於陳暹而益工六法其圖像大小古

面奇裝絲密蕭散皆有意態纖穠冶麗為世所賞

吳縣舊志

仇英字實夫

藝苑卮言云號十洲

太倉人移家郡城畫師周臣而格力不

逮特工臨摹粉圖黃紙落筆亂真至於髮翠毫金絲丹縷素

精麗艷逸無慚古人女號杜陵內史能人物畫有父風

王穉登丹

青志

周之冕字服卿號少谷長洲人寫意花鳥最有神韻設色亦鮮

雅家畜各種禽鳥詳其飲啄飛止故動筆具有生意

畫史會要

陸復字明本吳江人善畫梅自號梅花主人

松陵文獻

顧亨字汝嘉長洲人行草隸篆並入能品真楷為一時之冠以

書事肅皇帝歷官至太常寺丞皇甫訪長洲志

周叔宗名祖以字行用之孫好禪理工真草書自言得晉人法

有高韻嘗至京師名大噪時人求其泥金書者一字一金松陵

文獻

張元舉字懋賢吳縣人畫得外祖陳道復之傳氣韻生動人以

金帛請輒拒酒酣興至縱筆揮灑遠近購其縑素以為珍玩

吳縣志

鄒明字啟東善傳真得意時絲髮無不肖者松陵文獻

尤求字鳳邱長洲人仇英壻也以寫人物擅一時嘗畫揭鉢圖

天人帝釋羣鬼阿難各極變態見者或起栗女適周牧夫婦

皆工繪事江南通志

顧聽字元方吳縣人精於字學趙宦光纂說文長箋聽相與訂

考其摹古篆鐫刻印章為海內冠又研窮歷數造壺漏算刻

度數不爽毫髮吳縣志

嚴澍字道時文靖公訥第三子善書得虞永興米南宮筆法寺

廟碑額多其所書又好畜古尊彝書畫年甫三十二卒弟濟

字道行善書得曹娥碑筆意錢陸燦常熟志

張金字德純以字行居梅里以畫猫自給人或買懸堂中真猫

見而怒與之鬪名遂重知縣劉時俊高其行嘗屏騶從造其

門短几山肴相對移晷

松陵文獻

邵彌字僧彌長洲人少受業於錢謙益好學多才藝詩宗陶韋

畫仿宋元草書出入大小米楷法逼虞褚平生揮灑小幀尺

幅人皆藏弃或購之累數十金而彌用以搜金石鼎彝及圖

章玩好諸物此外蕭然無辨題所居曰頤堂性舒緩有潔癖

整拂巾屐經營几硯煩數織悉僮僕厭苦妻子竊罵終其身

不為改

吳偉業邵山人墓誌

卞文瑜字潤甫長洲人工畫山水不名一家生平無定居爐香

茗椀到處自隨吳偉業九友歌有晚年筆力凌滄洲幅巾鶴

髮輕王侯之句壻俞絲字言如亦以畫名

江南通志

王綦字履若吳縣人工繪事寫山水花鳥俱蕭閒靜遠性狷介

杜門以畫自娛兼供晨夕不窺戶外一步

通志

本朝

○沈顥字朗倩吳縣人性豪放好奇工書畫所著有枕瓢焚硯

浣花閒話螭阿雜俎河洛六峯諸書

舊府志

○張宏字君度吳縣人工山水蒼勁雅秀蕭疎淡遠不讓元人

妙品

張庚國朝畫徵錄

○潘澄字若水崑山人性狂善畫時吳中張宏陳遵之流皆以

山水擅名澄後起遂駕其上又喜飲每酒酣放歌潑墨淋漓

見者疑有神助素尚氣節泰興給事中季開生嘗延澄至京

師開生以言得罪徙尚陽堡親朋無敢送者澄獨襆被追隨相依歲餘乃還

唐德宜崑新志稿

○王簡字維文吳縣人精於寫真下筆鬚眉逼肖康熙初召入供奉 恩賞甚渥

通志

○徐州字南徐常熟人工於晉唐小楷凡六書篆籀之學無不通習又以古人碑碣多自鐫刻每臨摹法書刻石皆極精工

舊府志

○吳歷字漁山常熟人為人簡遠不羣彈琴詠詩寫山水皆有高韻錢謙益王時敏亟稱之晚年絕人逃世泛海不知所之

昭文志

○王翬字石谷常熟人幼嗜畫運筆構思天機迅露迥出時流太倉王鑑遊虞山見其所畫扇大驚異請相見翬遂執弟子禮鑑卽載之歸與奉常時敏邀致西田別墅悉發所藏相與探尋翬逐一臨摹自董巨而下至黃王倪吳諸家盡得其用筆之法由是其業遂冠一代時敏稱其畫品在沈石田上時武進惲壽平亦以山水自負及見翬畫度不能及乃改寫生以避之嘗奉

詔繪南巡圖一時公卿題贈卷軸如牛腰年踰八十猶磅礴不衰四方爭走金幣冀獲其真者同里楊晉字子鶴受筆法於翬烟林清曠尤工畫牛亦與翬同繪南巡圖晚年兼能寫生

傳神其後有唐俊字石耕畫山水花竹亦以鮮妍見稱畫徵錄昭

文志合纂

○沈虬字次雪吳江人以歲貢知錢塘縣後調嘉善罷歸虬工

書得文徵明法盛行於時子天寶字竹西康熙乙酉舉人亦

以能詩善書名

震澤新志

○馬元馭字扶曦常熟人父眉字子白善寫生蘆鴈入神品元

馭作沒骨法最工蒼秀生動久而不脫一時與王翬山水並

馳名遠近蔣廷錫少時嘗從元馭受筆法子逸女荃皆能傳

其業

○高簡字淡游吳縣人畫清曠得倪瓚法亦能詩通志

○黃鼎字尊古常熟人寫山水蒼古秀潤自稱獨徃客通志

○馬昂字雲上吳縣人工畫山水花鳥雲物曲盡其致吳縣新志

○徐溶字雲滄吳江人工山水初泛學無宗主中歲師王翬遂

大變其積習筆墨蒼秀小幅蕭疎閒冷直逼元人畫徵錄

○陸謬字其清吳縣人博聞汲古多藏書手抄及千卷有朱存

理錢穀之風精賞鑑三代秦漢器物及唐宋而下書畫名蹟

四方士大夫之好古者莫不就謬是正焉通志

○王岐字斗文長洲諸生從何焯學文有典則書宗晉唐尤得

力於李北海徐季海兩家遒勁中有排蕩之致蠅頭小楷懸

臂疾書最為能品人亦修潔自好淡於進取為鄉里所稱



以上書畫

唐

周廣吳隱士妙於醫受訣於同郡紀朋觀人顏色談笑卽知疾深淺開元中召至京師有宮人每日昃則笑歌啼號若狂疾而足不能及地廣曰此必因食飽促力復仆於地而然飲以雲母湯令熟寐寐覺失所苦問之乃言太華公主載誕三日宮中大陳歌吹此宮人主謳欲其聲清長食純蹄羹遂飽當筵歌大曲曲罷覺胸中甚憤戲於砌臺乘高而下未及半復爲後來者所激因仆地比蘇卽病狂自是足不能及地又有黃門自交廣使回拜舞殿下廣曰此人腹中有蛟龍明日當

產一子卽不可活矣上驚問黃門有疾否對曰臣馳馬大庾嶺大熱而渴於路傍飲野水今腹中堅痞如石廣以消石雄黃煮飲之吐出物數寸其大如指鱗甲備具投之水俄頃長數尺遽以苦酒沃之復如故形上驚異禮敬之欲授以官爵固請還吳中水部員外郎劉復爲廣作傳敘述甚備

明皇  
雜錄

元

葛應雷字震父吳人世業儒父從豫攻於醫應雷幼爲舉子文學益進宋亡場屋事廢遂以家藏靈樞素問諸書研精覃思著醫學會同二十卷見世之言醫者拘方執論而莫究其源委於是推五運六氣之標本察陰陽升降之左右以定五臟

蘇州府志 卷之二十一  
六腑之虛實以合經絡氣血之流注而知疾病之候死生之期其處方製劑施砭熨率與他醫異時浙西提刑按察司判官李某中州名醫也嘗因其父有疾自診之復諮於應雷聞其荅父子相顧駭愕曰南方亦有此人耶乃盡出所藏劉守真張潔古書與之討論無不脗合而劉張之學行於江南者自此始由平江醫學教授陞江浙官醫提舉子乾孫克世其業尤篤於文學

盧志

明

倪維德字仲賢吳縣人祖父皆以醫顯維德幼嗜學已乃業醫以內經爲宗病大觀以來醫者率用裴宗元陳師文和劑局

方故方新病多不合乃求金人劉元素張從正李杲三家書讀之出而治疾無不立效周萬戶子八歲昏眊不識饑飽寒暑以土灰自塞其口診之曰此慢脾風也脾藏智脾慢則智短以疏風治脾劑投之卽愈顧顯卿右耳下生癭大與首同痛不可忍診之曰此手足少陽經受邪也飲之藥踰月愈劉子正妻病氣厥或哭或笑人以爲祟診之曰此手脉俱沉胃脘必有所積積則痛問之果然以生熟水導之吐痰涎數升愈盛架閣妻左右臂竒癢延及頭面不可禁灼之以艾則暫止診之曰左脉沉右脉浮且盛此滋味過盛所致也投以劑旋愈林仲實以勞得熱疾熱隨日出入爲進退暄盛則增劇

夜涼及雨則否如是者二年診之曰此七情內傷陽氣不升  
 陰火漸熾故溫則進涼則退投以東垣內傷之劑亦立愈也  
 所療治多類此常言劉張二氏多主攻李氏惟調護中氣主  
 補蓋隨時推移不得不然故其主方不執一說常患眼科雜  
 出方論無全書著元機啟微又較訂東垣試效方並刊行於

世洪武十年卒年七十五

明史

劉勉字仲勉其先汴人宋南渡寓於吳世為瘍醫至勉術益精  
 至元間大臣薦為尚醫食太醫祿入侍帷幄出隨扈從被遇  
 特加以母病乞歸尋以省臺交薦舉授保冲大夫江浙官醫  
 提舉明初命選名醫召至京以老病放歸終於家生平視病

不分貧富或顛連無告者且賑給之凡瘡瘍必躬注善藥不  
 假割剝之功嘗曰富者吾不利其所有貧者吾不倦其所求  
 若勉者殆進於道者乎

盧志

趙良仁字以德其先於宋有屬籍良仁少試吏憲司即棄去從  
 丹溪朱彥修學醫治療多有奇效名動浙西東所著醫學宗  
 旨金匱方衍義并丹溪藥要等書張氏據吳良仁挈家去浙  
 後復來吳占籍長洲以高壽終子友同自有傳

姑蘇志

韓凝字復陽系出魏國忠獻王琦精於醫張氏入吳收引士類  
 凝隱居不仕子二奕夷奕在隱逸傳

今見吳縣人物

夷字伯翼少失

母凝命奕育之為後因名詒孫洪武中為郡醫學正科永樂

二年從兄太醫院使奭言於上召授御醫改名夷字公達賜第致和街繼陞院判奕卒陳情得假歸葬仍給葬費永樂十一年扈駕北巡歸病不能朝上命中貴視疾遣人龜卜既沒歎悼賜葬祭視三品奭字公茂凝弟冲之子洪武末為燕府良醫正從文廟陞太醫院判進院使扈駕北巡永樂九年歸京卒用三品禮葬奭兄弟同時被遇仕皆通顯奭子傳亦官御醫與奕子有有子充奕從子襄皆守世業

姑蘇志

姚良字晉卿明醫所著有律呂會元沂源指治方論考古針灸

圖經

張杲吳中人物志

林文友字會之先世自閩來吳祖茂芝在宋以占筮隱塵市間

文友早歲留意醫學心存利濟晚得攝生之術以高壽終子

以義授御醫

吳中人物志

顧顒字昂夫遂於醫應薦入京師求治者日不暇給遂巧歸築

南園草堂隱居其中綸巾野服出坐藍輿挾冊吟詠以疾告

者不問貧富俱應顒孫朴朴子昱昱從弟崇惠崇惠子宗陽

凡五世俱精其業楊儀為作五明醫傳

龔立本常熟志

沈貞字士怡精於醫患傷寒難治因以仲景論為主取李浩或

問郭雍補亡迄今凡論傷寒者集而為傳名曰傷寒會通吳

下諸醫謂其補仲景之未備同里許律字用韶元醫學教授

矩之子得世傳之秘凡人疾所不能療者一經診視死生立

决 周世昌  
崑山志

劉觀字士賓長洲人世以醫顯父毅爲燕府良醫後坐事謫戍沒永樂初追念邸臣召觀還擢御醫賜居第凡中外親藩貴戚及公卿近臣有疾多命往治尋陞院判掌院事扈從北征歸卒子溥自有傳孫倫字宗序成化中爲御醫 姑蘇志

盛寅字啟東吳江人受業於郡人王賓初賓與金華戴原禮游冀得其醫術原禮笑曰吾固無所吝君獨不能少屈乎賓謝曰吾老矣不能復居弟子列他日俟原禮出竊發其書以去遂得其傳將死無子以授寅寅旣得原禮之學復討究內經以下諸方書醫大有名永樂初爲醫學正科坐累輸作天壽

山列侯監工者見而奇之令主書筭先是有中使督花鳥於江南主寅舍病脹寅愈之適遇諸途驚曰盛先生固無恙耶予所事太監正苦脹盍與我視之旣視投以藥立愈會成祖較射西苑太監往侍成祖遙望見愕然曰謂汝死矣安得生太監具以告因盛稱寅卽召入便殿令診脉寅奏上脈有風濕帝大然之進藥果效遂授御醫一日雪霽召見帝語白溝河戰勝狀氣色甚厲寅曰是殆有天命耳帝不懌起而視雪寅復吟唐人詩長安有貧者宜瑞不宜多句聞者咋舌他日與同官對奕御藥房帝猝至兩人斂衽伏地謝死罪帝命終之且坐以觀寅三勝帝喜命賦詩立就帝益喜賜象牙棋枰

并詞一闕帝晚年猶欲出塞寅以帝春秋高勸母行不納果  
有榆木川之變仁宗在東宮時妃張氏經期不至者十月衆  
醫以姪身賀寅獨謂不然出言病狀妃遙聞之曰醫言甚當  
有此人何不令早視我及疏方乃破血劑東宮怒不用數日  
病益甚命寅再視疏方如前妃令進藥而東宮慮墮胎械寅  
以待已而血大下病旋愈當寅之被繫也闔門惶怖曰是殆  
磔死既三日紅仗前導還邸舍賞賜甚厚寅與袁忠徹素爲  
東宮所惡既愈妃疾而怒猶未解懼甚忠徹曉相術知仁宗  
壽不永密告寅寅猶畏禍及仁宗嗣位求出爲南京太醫院  
宣宗立召還正統六年卒兩京太醫院皆祀寅

明史寅弟宏字

叔大與寅同馳名亦入爲御醫景泰初治宮妃疾有效當進

官不拜乞落其戍籍詔許之尋乞致仕寅子俱孫愷

松陵文獻云當

作俱以醫能世其家有劉毓字德美其傳出自寅與李懋字

思勉者成化間俱官至御醫

姑蘇志

沈以潛名元以字行其先由汴徙吳高宗親書良惠二字賜之

祖伯新父日章皆有醫名以潛少孤能自刻勵宣德初徵入

爲醫士未甚知名會院判蔣用文病上遣中使問之曰卿卽

死誰可代者用文書以潛名進卽擢爲御醫進對稱旨上謂

用文能知人以潛不負所舉以潛爲人平易質重工詩好琴

有集行世子寅孫熙守其業

姑蘇志又陝西通志蘭州志流寓內俱載沈繹字成章吳縣

人洪武間謫戍蘭州衛精醫道保任肅府良醫敦志節善琴工詩與崑山丁晉錢塘楊志善俱以齒德為時所重號金城三老所著有醫方集要平治活法繪素集芝軒集諸書即以潛之諸父也葉盛水東日記亦載其與吳江鄒奕相倡和事舊志不載蓋因其謫戍不歸而遺之也今附見於此

葛哲字明仲世業儒尤精醫藥哲以薦授荆府良醫所著有保

嬰集上之朝弟睿亦善醫時稱二葛

崑山志

吳誠字誠伯常州人父可大徙家於吳以醫名誠世其業尤於

傷寒著名自後有施宗文盛文繼者俱以傷寒著奇驗

姑蘇志

錢瑛字良玉世傳顧頤醫宣德中入太醫院寧陽侯孫生九月

驚悸數啼而汗百方莫效瑛後至乃命坐兒於地使掬水為

戲驚啼頓止人問之曰時當季春兒豐衣帷處不離懷抱其

熱鬱安所洩耶使之近水則火邪殺得土氣則藏氣平故不

藥而愈子恒愷悌愷世其業恒仕至太醫院判與愷尤有名

又有陳公賢者其先為孟景暘館甥孟氏亦以顧頤鳴遂得

其傳成化間公賢徵為醫士入御藥房用藥屢效授御醫進

太醫院判致仕卒賜諭祭蓋吳下小兒醫稱錢氏陳氏云

姑蘇志

王敏字時勉賓之從孫少孤貧從韓有盛寅學醫名日起一婦

人病血蠱眾治之不愈敏曰娠耳當得男投安胎劑果得男

海道總帥燕客飾伶人為女子佐酒無疾也敏視其頰頰面

青羸而氣微促語帥曰火克金之兆也火令司天其殆矣明

蘇州府志 卷之六十一  
年六月嘔血死千戶申志年近二十忽瞑眩譫語體熱而咳  
衆以傷寒治敏曰痘也與升均湯而瘡出一人疽發背不起  
瘍醫言起則治矣敏曰是擊指脉卽起亦不治衆劫以艾疽  
起如栗衆曰無傷矣竟三日死平日治士大夫甚多不受其  
報與張頤同時敏年差少頤以瞽敏以瞶而皆有名於吳下

姑蘇志

欽謙吳縣人官太醫院判宣宗數名見索秘方三問皆以不知  
對最後謙伏地曰臣以醫職在保護聖躬陛下承祖宗鴻業  
宜兢兢自愛若此等方藥先賢不傳臣死不敢奉旨上愧怒  
命武士以旃裹頭付詔獄謙入朝不歸家人莫知其由遍訪

不得有錦衣卒知狀言械繫衛獄後幽室中久之上悔悟釋

出復其官正統末隨駕至土木狗難天順初贈奉政大夫太

醫院判使廕其後

舊府志

唐朴字尙質六世祖永卿爲元平江路醫學教授朴與弟椿皆  
以醫名朴嘗過張秋大疫爲藥貯大盎飲之所活數千人年  
八十餘無疾而卒椿字尙齡參考諸家方論至老不倦所著  
原病集方術家多宗之從子杲字德明未冠名聞四方太倉  
武指揮妻起立如常臥則氣絕欲死杲言是爲懸飲飲在喉  
間坐時則墜故無害臥則壅塞諸竅不得出入而欲死也投  
以十棗湯而平

舊府志



王觀賓曾孫爲醫操遠識集奇效先後不可勝算自成化以來  
江之南北達乎京師以及四遠稱上醫者觀爲之冠爲人高  
簡自愛子穀禎穀祥述觀之事

長洲志

盧志字宗尹崑山人精素難諸家之書弘治中應名醫詔至京  
擢太醫院判武宗南巡不豫召志診視志趣告諸大臣言冬  
得夏脉於法不治願定皇儲以安國本侃侃關宗社大計等  
致仕所著有醫學百問等書子榎嘉靖乙未進士官兵部員

外郎

崑山志

薛已字新甫號立齋吳縣人父鎧字良武爲諸生兼精醫理弘  
治間以明醫徵入太醫院屢著奇驗所著保嬰撮要足爲後

法已性穎異過目輒成誦尤殫精方書於醫術無所不通正

德時選爲御醫擢南京院判嘉靖間進院使所著有家居醫

錄十六種醫家多遵守之

王志堅人物傳

張沖虛善醫多奇效有道人就竈吹火一蜈蚣伏火筒中誤吸  
入腹痛不可忍沖虛命碎雞子數枚傾白碗中令啜之良久  
痛少定索生油與嚙須臾大吐則雞子與蜈蚣纏束而下蓋  
二物氣類相制入腹則合爲一人服其得醫意云

吳縣志

曹德字子新無錫人來吳師錢氏爲兒醫盡得其傳術加神焉  
徙居胥江診視投藥計日可愈一達官家以孫病迎德子告  
曰老父病瘡諸醫莫療德曰先愈祖而及孫可乎兩日間祖

孫並霍然起人始知德非專幼科也年逾九十無疾而終張鳳

翼集

張世華字君美其先汴人宋南渡時有名彥者以防禦使擁兵衛吳遂家焉三傳至端禮始以醫名逮元善進爲保冲大夫曾大父縉尤著名嘗爲周文襄所禮重父頤字養正能預刻年月決人生死世華嘗就徵從使西南諸國軍士行道病者多賴全活正德間吳中大疫世華攜藥囊於通衢隨請而應有酬之金帛笑而謝之子成德孫學禮並以保御勞擢官長洲

志

劉承宗字繼仁吳縣人年十五從其祖受醫方祖所診療竊識

之有大馭祝某得竒疾醫弗能治適祖他往乃迎承宗曰易治耳用某藥可愈諸醫以年少詆之然竟愈於是名大著嘉靖甲寅倭變客兵來援者多病疫承宗以釜鬲煮藥飲之僵踣立起日應四方延請風雨不辭萬歷初子弘道登第人以子旣貴不敢以疾求診承宗聞輒赴之晚頗好聲伎卒吳縣志

張康忠字孝資號廉水精脉理時以切脉决人休咎或懸斷數年後事皆不爽吳興一貴人病致聘百金康忠方服親喪強之行至則要以更衣康忠愠曰此豈可易哉汝金具在遽取還之趣權歸貴人不得已聽其麻衣入視時貴人不寐已四十日康忠投一劑卽安寢更數劑而愈嘉興大家婦病腹痛

康忠治之下一蛇其竒效多此類性不治生有所得卽以濟貧者子允積亦能醫

吳縣志

繆希雍字仲醇常熟人精醫術醫經經方靡不討論尤精本草之學嘗謂古三墳之書未經秦火者獨此而已神農本經譬之六經也各醫增補別錄譬之註疏也本經以經之別錄以緯之沈研鑽極割剝理解作本草經疏本草單方等書抉摘軒岐未發之秘爲人電目戟髯如羽人劍客好談古今國事成敗如指掌實竒士也

錢陸燦常熟志

陳廷讚字襟宇爲小兒醫二子俱登賢書矣邨童里嫗篝燈叩門昏夜卽往繩牀土坐兒呱呱啼敗絮中便溲狼籍腥臊垢穢未嘗蹙額掩鼻也所得藥資具甘旨奉母時效嬰兒啼笑以相娛悅二子仕爲令詒書戒之曰醫誤殺一人吏誤殺一

邑我有十指糊口無以盜泉爲鼎養也年八十三卒

錢陸燦常熟志

侯周臣字崑璧本嘉定人篤學好修讀素問靈樞等篇謂內經一書與易相表裏天人性命之理盡在是因棄帖括專精醫術吳中士大夫延請無虛日遂徙居長洲全活者無筭所得悉以施藥濟貧崇禎癸酉巡按御史祁彪佳獎其德行卒年七十九子秉中敦尙節義以諸生紹其業

長洲志


黃庭森字芝石精於痘科有回生之術時號神醫子國熙紹其業療痘多竒驗俞氏子六歲痘甚稀國熙曰法在不治他醫

治之愈主家張樂設席并邀國熙以致誚國熙至請兒視之  
曰演劇時宜避鑼聲言訖辭去主家置若罔聞有頃兒聞鑼  
聲發驚暴死張氏子痘繁密乳媪抱兒出視國熙熟視謂其  
主曰令子無恙乳媪當死數日後兒愈媪果死舊府志  
周維穉字仲肅崑山人幼嗜學得咯血疾棄儒業醫從繆希雍  
游盡得其傳授太醫官江南通志

本朝

○鄭欽諭字三山吳縣人先代習帶下醫子孫世其業門前有  
假山故世以山爲字欽諭兼精諸科所治無不效性孝友冲  
和樂易爲善如不及所得餽遺輒以濟人凡飼饑絮寒埋瘞

掩骼不可勝數徐汧楊廷樞殉節後子孫朝夕不給欽諭以  
己女女廷樞次子以子之洪女女汧孫傾身收卹弗吝康熙  
初卒年七十六之洪字青山性至孝事親屏氣愉色視下應  
唯侍父寢處非遠出未嘗宿內夙興燭湯手進父飯亦飯齋  
亦齋止飲亦止飲視親疾藥必嘗衣不解帶母沒執喪致毀  
事後母如所生兄亡以其子子之遇寡嫂惟謹年四十六先  
父卒妻顧能盡婦道逾年亦卒聞者傷之吳偉業誌  
參舊府志  
○劉默字默生錢塘人僑居郡城專諸里以醫名遇危症能收  
奇效所著有證治石鏡錄本草發明纂要舊府志  
○李希春字含章郡人精於治痘巡撫周國佐贈以額曰一經



獨聖又張靖字涵高橫渠先生後精治痧痘不受貧交餽遺  
卽富室所贈仍以濟人舊府志

○陳驥字千里常熟人從喻昌游治病多奇驗好藏法書名畫  
蒔花種竹所交皆一時名流舊府志參  
昭文志

○李維麟字石浮常熟人精於察脉決人死生多奇中爲人孝  
友純篤所著有內經摘粹補註醫宗要略等書子顥字伯武  
亦恪謹而善醫錢志參  
昭文志

○沈時譽字明生華亭人徙吳居桃花塢唐寅別業工醫切脉  
若神投劑輒起晚年築室山中著醫衡病議治驗諸書舊府志

○方震字青來吳縣人能以金針治眼雖瞽目立可復明江都

吳綺以哭子喪明越數年就震治震出金針長寸許初從兩  
目角入既入黑睛約半寸卷去內障如風之掃籜雲之過空  
乃作字以示綺曰某字也其神效類如此孫文焯能世其業

吳縣  
新志

以上醫

南北朝宋

褚嗣吳郡人年七歲棋入高品及長冠絕當時嗣父榮期與臧  
質同逆嗣應從誅何尚之請曰嗣奕棋之妙超古冠今魏雙  
犯令以才獲免父戮子宥其例甚多特乞與其微命使異術  
不絕不許時人痛惜之宋書

齊

褚思莊南史蕭惠基傳曰當時能棋人琅邪王抗第一品吳郡  
 褚思莊會稽夏赤松第二品赤松思速善於大行思莊思遲  
 巧於鬪棋宋文帝時羊元保為會稽帝遣思莊入東與元保  
 戲因製局圖還於帝前覆之齊高帝使思莊與王抗交賭自  
 食時至日暮一局始竟上倦遣還省至五更方決抗睡於局  
 後思莊達旦不寐時或云思莊所以品第致高緣其用思深  
 久人不能及抗思莊並至給事中

唐

趙師貞觀中善琴嘗云吳聲清婉若長江廣流綿綿徐徐國士

之風今樂府有吳音子夜世俗之樂也

吳中人  
物志

石荆山吳人善琴為獨孤及所重名與之游荆山於琴博而熟

每操嘗以十合小豆為準盡一升而移品

盧志

姚兼濟吳人善琴得石荆山之傳在揚州逢異人授以琴操撫  
 之聲果奇兼濟固求學焉異人乃授以清風景雲等五調世  
 人以為廣陵散之遺音也

盧志

宋

朱億字延平長文之祖邃於琴家有古琴池中書曰上元濱題

曰玉磬上元唐肅宗紀年長文著琴史而書玉磬事

吳中人  
物志

張炳炎咸淳中及第其父大理評事肖說嘗與徐南溪論琴得

其所著琴書以遺俞琰故吳中有其傳姑蘇志

明

張楠字大本吳人從陸墓張氏習琴積三十年遂獨步一時名

滿江湖間然不大業家年五十四以窮死王寵張琴師傳

本朝

○夏溥字于澗郡人以善琴遊四方康熙二十八年

聖祖南巡召見行在命鼓琴稱旨問何不至京師溥以親老

對

上嘉其孝不强也又常熟單嘉孝字臻屢亦以善琴名

以上琴棋

漢

吳泰能筮會稽盧氏失博山香爐使筮之泰曰此物質雖為金

其象實山有樹非林有孔非泉闔闔風至遂發青烟此香爐

也語其主處求即得集異記

五代吳越

朱景環筭術精妙貞明中廣陵王錢元璪鎮吳景環居盤門驛

上書元璪云到任當三十年安寧元璪命燭焚去謂其說尙

遠未之敬也至天福庚子辛丑間忽記其事召景環問之曰

筭數定矣願公計後事及期果薨吳郡志

顏規本吳郡玉工廣陵王錢元璪常令於便廳解玉王每召朱

景環訪問筭術遁甲規穎悟熟聞其說盡記之一日以所記質於景環景環授以學遂精筭術忠獻王嘗欲享廟規上書言翌日利五鼓之前如用寅時則杜門在南不可出入不聽翌日寅時車出南門鑰以鑰壞久之不能啟遂破鑰而出由是知名王遂以為軍師

吳郡志

宋

胡舜申紹興間自績溪徙吳通風土陰陽之術世所傳江西地理新法出於舜申嘗行郡四郭而相之以為蛇門不當塞作

吳門忠告一篇

吳郡志 吳門忠告詳見雜記

元

王仁美字安之善相決人死生休咎無不驗人號為王電目

吳中

人物志

范疇字復初本金華人嘗為洞霄宮道士得江西張九牛著易之占神妙莫測杭有無藉子胡婆壽負罪而逃官督捕甚嚴捕者即疇求筮爻成疇曰可於北方樹中得之如言跡至臨平果獲於空楊樹中遂繫獄後會赦胡出欲害疇一日持刀晨叩疇門給以卜疇決以占知其將不利於己隔門謂之曰欲問卜可擲下手中刀胡聞之駭服猶以刃畫其門而去疇由是來蘇避之寓乘魚橋設肆有疑來問者莫不神驗年八

十三卒

盧志



明

周仲高精天文地理之學遊四方廣山大川觀陰陽之會徵休咎之符時方承平自錢塘來崑山曰天下兵且起吾卜地莫如婁善遂居焉已而錢塘燬於兵而崑山無恙崑山自縣衙及神宇人宅相方定位卜日揆辰皆出仲高

崑山志

沈晟字景暘吳中卜者永樂末驛取至京命午門上布卦問英

國公征安南事占曰明日正午當得捷音至其時果飛騎報

生擒黎賊上大悅賜紗幣遣還

吳中人物志

徐懋榮字野雲武功伯有貞四世孫性聰穎總角即能文因相具五偏人鄙其貌遂棄舉子業發先世所遺青鳥家書讀之

未甚省家有真武像相傳為馬遠筆處事有年一夕夢神揮

劍去懋榮頭而更易之既覺攬鏡自照則頭容已正矣有道

士桑旣白自江西至一見如舊識因出所讀書相與剖析疑

義遂精堪輿年七十一卒子大衍傳其術更習天宮星緯之

學崇禎時夜觀天象謂北斗中權星暗小知吳中必多故命

仲子永銘預入浙東括蒼山為避世計先是大衍嘗偕友楊

某往江北訪一道人至山峻處仰望柴扉已預書今日有徐

某楊某到此因師事之從受六壬秘要年七十一偶感微疾

語家人曰頃占六壬課得從革用神入墓吾將逝矣果卒季

子永鎮傳其業著堪輿彙纂八卷卒年亦七十一

舊府志

蘇州府志 卷之六 三  
金鬼谷家於郡城中醋庫巷嘗有富商問命肆中適一貧者負薪而來告曰我年月日時皆與彼同何彼富而我貧也鬼谷曰汝雖生於此當於南方千里之外亦與富者相埒貧者告其母母曰汝有姊在閩中當往求之他日詣姊家姊亦甚貧不能容姊知隣舍有隙所但一宿必見鬼物乃使暫宿之貧者入夜果見鬼物入穴中遂得黃金百鎰有金鼓覆其上貧者得金致富而歸以金鼓報之鬼谷因署其門曰吳中名術

金鼓傳家

舊府志

皇甫焯字文含參政渙孫博學能文旁究六壬遁甲之術崇禎十年以明經對策京師有試其術者叩以日中休咎焯占之

曰今日主馬驚其人哂曰吾此馬服之二十年騁高凌阻如履康莊何至泛駕哉將歸謂馭者曰善控之毋爲皇甫先生所笑也行未二里馬遇橐駝駭而奔其人僅免心服焯之竒

中自此知名京師

松陵文獻

柳黃岳號山樵吳縣人善卜家貧依姊以居姊曰人生定有發跡之日爾盍卜之黃岳曰卜之矣我來春正月當以此起家至元旦有問卜者倉皇而來課成問何事曰爲失物黃岳曰失物當在行舟然物仍未失也只在舟中覓之申酉時可得其人喜曰幸如君言當以五十金奉酬是晚果於竈穴得之其人相贈如約自此傾動一時決疑竒中多類此

舊府志

楊莪字碩甫吳江人其師松仙鬼谷子之流莪以術數行常熟  
人有問焉輒書隱語以荅後必奇中或匿其所問事不使知  
對亦如響從瞿式耜於廣西式耜殉國莪收屍付其孫歸葬  
人謂莪非術士蓋義士也

昭文志

以上術數

春秋

干將吳人與歐冶子同師俱能為劍闔閭使作劍二枚一曰干  
將二曰莫邪莫邪干將之妻也干將作劍采五山之鐵精六  
合之金英候天伺地陰陽同光百神臨觀天氣下降而金鐵  
之精不銷干將不知其由莫邪曰子以善為劍聞於王王使

作劍三月不成其有意乎干將曰吾不知其理也莫邪曰夫  
神物之化須人而成今夫子作劍得無得其人而後成乎干  
將曰昔吾師作冶金鐵之類不銷夫妻俱入冶爐中然後成  
物後世即山作冶麻經姦服然後敢鑄金於山今吾作劍不  
變化者其若斯耶莫邪曰師知爍身以成物吾何難哉於是  
干將妻乃斷髮剪爪投於爐中使童女童男三百人鼓橐囊  
炭金鐵乃濡遂以成劍陽曰干將陰曰莫邪陽作龜文陰作  
漫理干將匿其雄獻其雌闔閭甚重之

吳越春秋

三國

葛衡字思真吳人明達天官能為機巧作渾天使地居於中以

機動之天轉而地止以上應晷度

晉陽秋

唐

楊惠之初與吳道子同師學畫見道子藝成惠之恥焉更為塑工遂為天下第一手崑山慧聚寺毘沙門天王像相傳惠之所作形模如生其傍二侍女尤佳徐林嘗記其像戒後人不可妄加修飾後果為俗工修治遂失初意

姑蘇志本中吳紀聞按惠之事見

歷代名畫記及劉道醇五代名畫補遺俱不言何處人姑蘇志豈因崑山慧聚寺有其遺蹟遂以為吳人歟

宋

李珣吳人善律歷之學紹聖二年曾肇為滁州守命珣為漏壺以順晝夜一郡則之

王洋滁州鼓樓記

張琪蘇州人妙於刊鑿趙竦為兩浙漕日以重定華夷圖方一

尺有半字如蠅頭而體製精楷俾琪刊之三年而成得之者

以為奇玩

盧志

袁遇昌吳之木瀆人以塑嬰孩名揚四方每用泥搏埴一對約高六七寸者價值三數十緡其齒唇眉髮與衣襦襞積勢似活動至於腦頤按之脅脅遇昌死其子不傳此藝遂絕

盧志

元

王某郡中漆匠也至正間嘗以牛皮製一舟內外飾以漆解卸作數節載至上都游漾灤河中可容二十人上都之人未嘗識舟觀者異之又嘗奉旨造渾天儀可以折疊便於收藏其

巧思出人意表遂命為管匠提舉姑蘇志

明

蒯祥吳縣香山木工也能主大營繕永樂十五年建北京宮殿  
正統中重作三殿及文武諸司天順末作裕陵皆其營度能  
以兩手握筆畫雙龍合之如一每宮中有所修繕中使導以  
入祥畧用尺準度若不經意既造成以置原所不差毫釐指  
使羣工有違其教者輒不稱旨初授職營繕所丞累官至工  
部左侍郎食從一品俸至憲宗時年八十餘仍執技供奉上  
每以蒯魯班呼之同時有蔡某亦造宮殿授銜至尙寶司丞

吳縣志

馬士鯉字雲達吳縣人精石刻四方名公所書碑碣多出其手  
性豪邁敦行誼與人談忠孝事輒疊疊不倦天啟中吳下爭  
為魏忠賢建祠立碑巡撫毛一鷺檄府縣命士鯉鐫刻士鯉  
聞而宵遁匿身浙右繼而魏大中被逮過吳門周順昌欲以  
女字其孫倉卒無媒士鯉曰非我莫之為也遂通兩姓之好  
大中拷掠坐贓士鯉四方奔募悉以所得歸其子輸官其潔  
清白好如此舊府志  
薄珏字子珏長洲人居嘉興其學精微博奧莫知所授崇禎中  
流寇犯安慶巡撫張國維令珏造銅砲砲發三十里每發一  
砲設千里鏡視賊所在賊遇之糜爛又製水車水銃地雷地

嘉州府志 卷之六  
弩等器殲賊無算國維薦於朝不報退歸吳門蕭然蓬戶室  
中器具畢備嘗造渾天儀周圍不踰尺而日月之盈縮朧胸  
星辰之宿離伏逆不爽累黍其法用直線分割圓輪以有定  
之角絜無定之邊東西南北遠至億萬里如在咫尺於古來  
諸歷家獨推郭守敬授時歷海外亦重其名然卒以窮死所  
著有渾天儀圖說格物測地論等書

元和縣志


本朝

○顧聖之字德鄰吳縣人父顧道人工於製硯人稱聖之爲小  
道人所製硯皆倣古式樸雅可玩嘗曰刀法於整齊處易工  
於不整齊處理難明也子死媳獨擅其藝者二十餘年

通志舊府

志合纂

○顧嘉穎字庭如長洲人精於摹刻其刀法從畫中直下深而  
圓勁如運筆之用中鋒也一時士大夫家碑碣咸出其手嘗  
爲安岐摹勒孫過庭書譜逼肖真蹟遠勝停雲館刻本汪琬  
贈以詩稱爲絕藝子錫韓字覲侯能世其業



蘇州府志卷六十六 終

文化乙丑

後

